

# ESUS CHUIBENEQUIDON NAID

## *Esus aton Papan abuc indote*

<sup>1-2</sup> Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. <sup>3</sup> Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampänëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. <sup>4</sup> Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: — Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. <sup>5</sup> Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac — quepanëdash Esus.

<sup>6</sup> Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses

chuiquid dapa icpeque? Tantuanu. Chui — capanëdash Esus chuiquin. <sup>7</sup> Adoaquien: — Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. <sup>8</sup> Aden chuishumbic: — Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

<sup>9</sup> Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

<sup>10</sup> Adec Esusbëd choboedo isec tabadnubien dashcute ushumbocquid dasiuidquid daëd choash tabadec: <sup>11</sup> —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden — quepanëdash ushumbocquid dasiuidquid abuc isbededquido chiec.

*Matias Esus chuibeneta quequin iccued-edquidon chiaid*

<sup>12</sup> Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec

aidtiontsëqui capunëdash. Aido Edusaden yacno choash abuc quënë yacno abi tabadbocono decatoash tabadoapanëdash. <sup>13</sup> Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid quënë nuntan tabadnubi <sup>14</sup> utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiabimboec onquecuededpanëdash.

<sup>15</sup> Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: <sup>16-17</sup> —Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash. <sup>18</sup> Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquiash paëdec aton pucu tishidpac caondash. <sup>19</sup> Pucu tishidec in-tac chiuidaïd tied icsho tantiaquin Edusaden yacnocquidtedishun Aquedama cain aton onqueten cuëmbededpondash. <sup>20</sup> Adembidi ëndenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aibdidi  
aton matses nibëdquid shubu icpanuna.”

Aden Udas pado cuidte chuiquin cuëdënte Sadmo  
caid utsitsen naden Dabid Padon dada uaoa-  
pampic:

“Aidën icsain nacpaden tanenquiocquin ma utsin  
bëdamboen napanuna,”

quequin Dabid padon dada uapampic —  
quepanëdash Petedo. <sup>21</sup> Aden chiashic abi  
onquec: —Udas pado nibëdnuc Esus chuibeneta  
quequin abentsëc nuquitedishun chuinuna.  
Nëid quënë nuntan nuquibëd capuquido dada  
dadpen iquec. Nuqui Esus chuibeneta caid  
nadquid ictiad. Chuinu. Tantia. <sup>22</sup> Esus Uan  
padon acten mentosho isash niamëdenquio yec  
Esusbëd capucueneshun Esus indosho isquidquio  
icsho, Esus chuibeneta, quequin nuqui chuitiad.  
Adoac Esusën ëbi chuibeneta caidobëdtan Esus  
uincuemiaid chuibantiad —quepanëdash Petedo  
iccuededquido chiec.

<sup>23</sup> Aden Petedon chuibanac daëd istuidash Pe-  
tedobëd iccuededquido, Petedon chuibocpadquid  
nëid daëd iquec, quequin chuipanëdash aidon.  
Ambi istuidaïd abentsëc Ose cashun Badsabas  
cashumbic Ustus, quequin cuënaïd nepanëdash.  
Utsibic, Matias cuëmëdquid icpanëdash. Nëid  
daëd Petedon chuibocpadquid nec, quesho  
tantiashun: —Nënantanquio tabadec cho —cac  
abi daëdi choash tabadsho isash <sup>24</sup> Nuquin Papa  
chiec nadec iccuededquido onquepanëdash: —  
Nënantanquio chomeboed nëid daëd iqueque.  
Is, Papa. ¿Mitsicquidimbi Esus chuibeneta,  
cape? Èbitedi tantiame, Papa. <sup>25</sup> Udas pado

tauidtiadpambo chian anëdënquiacno nidboedën nauidaid namenu, quequin mimbi bëdamboen isaid abentsëc ëbi isme. Papa. Aden mimbi ismiac ma aidëntsen Esus chuibenepanuna —quepanëdash Nuquin Papa chiec. <sup>26</sup> Aden chuitanquimbic aid daëd abi cuëmëdquid abentse-abentsen dada uatempin dada uashumbic tëchun sandoshon cadotaniac dada uatempi abia puduenaid istanquin, Matias cuëmëdquid nec, quequin isbededboshic, Esusën ëbi chuibeneta caido onseted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

## 2

### *Aton Mayan Esus tantiaquidtedi menebanaid*

<sup>1</sup> Adashic isadaidbon ambi aton tiedën caniquid abia ëshëaid bedaid tantiaid ushë chotsëcnubi Esus tantiaquidtedi shubunuëshi iccuededoapanëdash. <sup>2</sup> Ambo iccuededquimbi badedquio shubu nuntan cunquequid dapa choec natiambo cunquiacbimboecsho abitedishun isbededpanëdash. <sup>3</sup> Aden aid isbedednubi cuëte dëtsisidacimboecquid budec mais-maisec Nuquin Papan Mayan matsadtocuededpanëdash abi isquidtedi. <sup>4</sup> Nuquin Papan ma aidobëd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanëdash ambi matsadtomiaidotedi. <sup>5</sup> Aden Nuquin Papan aton Mayan menenubien isadaidbo utsibo Édusaden yacno cho-choash dadpen tabadpanëdash. Aido Esus tantiesabo

yequi aton tsusedpabon chiampicpaden nanuec nidaid utsi-utsiec yacnoësh Edusaden yacno cho-chopanëdash. <sup>6</sup> Ambo cho-choash tabadnubi Nuquin Papan aton Mayan meniaid-meniaidquiec nëmbobi choquidon onqueten-onquetenquiec onquesho tantiash nëbi cho-chobedo utsi-utsiec: <sup>7</sup> —¡Padtec! Dacuëdanquiopaic. Ëbipadquiecsienda onquepec. ¿Onquequidotedi nidaid Cadidia yacnocquidoda nepec? <sup>8</sup> ¿Mitsipaden con onquete bedash onquecuededpec nec? <sup>9</sup> Ëbitedi nidaid utsi-utsiec yacnoësh cho-choquido nebi. Padtia yacnoësh choquido; utsibic, Media yacnoësh choquido; utsibic, Edan yacnoësh choquido; utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh choquido; utsibic, Ponto yacnoësh choquido; utsibic, Asia yacnoësh choquido; <sup>10-11</sup> utsibic, Pidiquia yacnoësh choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene udictsëcuësh choquido; utsibic, shubu dadpen icquid Doma caid yacnoësh choquido; utsibic, acte nënantan nidaid nactnëdquid Quideta caid yacnoësh choquido; utsibic, Adabia caid yacnoësh choquido. Isadaidbobëd isadaidbopadquio icnuequido Edusaden caid yacno tsusedpabon chiampicpaden nanuec cho-chobedo ëbitedi nebi. Ëbibimboec onquequidtedishun Nuquin Papan naid chuibansho tantiambi. <sup>12</sup> ¿Mitsipaden tantiaquin oncamiaquien adec onquepec? — quepanëdash Edusaden yacno cho-choquid.

13 Adnubien: —¿Bëdamboec onquepequida onquec? Paëmbocquid cubudquin acshun tantienquiocquido nepanui —queoapanëdash utsibo.

*Iccuededquido Petedon chuibanaid*

14 Adec onquesho tantiashun Esusën ëbi chuibeneta caido cho-choquin Petedon nidtoshon tantiamenu quequin naden cho-choboedo comapenec onquequin chuipanëdash: —Mimbi icsamboen tantiaid chiembique. Tantiata.

15 Ushë abuctotsëcnubi ëbitedishun paëmbocquid acamboccombi.

16 Utsin-utsinquec onqueten onquesho mimbi tantiaid Nuquin Papan ëndenquimboshë chiampicpadec onquec nebi. Tsusedpa Oedëmbi Nuquin Papan ma matsesbëd tabadnueshun aton Mayan menenun chiaid naden aidën dada uampic:

17 ‘Nëid nidaid naimbudnubi

Con Mayan matses utsi-utsien menendambi.

Aidon madobobëdtan aidon champibontsen ëmbi yuecquio icshun nanun chiaid chuibanendac.

Adembidi caniabontsen ushquin ëmbi chiacpaden isendac.

Adembidi tsusiobontsen ushquin ëmbi chiacpaden isendac.

18 Aden con Mayan meniac ambi tantiacpadomboembidi ëmbi chuiquin namiaidon dadan chidobëdtan

ëmbi yuecquio icshun nanun chiaidquiobidi chuibanoindac.

19 Adembidi, con Mayanën tantiamiac ëmbi yuecquio icshun nanun chiaid

matsesën    chuibanubien    abucuësh  
uinsadpamboctequid icnubi  
nidaidënshun ismete intacimboctequidbëdtabi  
nëdënquetequid   cuëte   pushudquidbim-  
boctequid   abembi   pushudquidbëdta  
adquidtedi mibi ismendambi.

<sup>20</sup> Adquid icnuc badiadën ushë chënquenquiocnoc  
inchëshacimboctequid   inchëshën   ushë   piu-  
piupambo yec intacimboecsho mimbi  
isbededendac.

Ëmbi ismiaidtedi icambi matses cuidte ushë  
choendac.

<sup>21</sup> Ismequimbi con Icbombo nec ëbi caquidquio  
mënchiquendambi,  
quequin Nuquin Papan chuimiapaden Oedën  
dada uapampic.

<sup>22</sup> “Adembidi Nuquin Papan chomiaid  
chiembique. Tantiata, isadaidbo. Nasaded  
caid yacnoësh choquid, Esus, Nuquin Papan  
chomiaid icquin nadatiambocquin nabanquin  
ismebansho mimbi isondac. <sup>23</sup> Aidi Nuquin  
Papan tantiampicpaden Esus bedshun mimbi  
isadaidpembo chuiquid menequin, Unës uata,  
cac cuesten dectanquin Esus unës uapanëdash.

<sup>24</sup> Aden mimbi nac unësacsho icsaisa chococacno  
yuec ictiapimbo iquec, qeshun Nuquin  
Papan Esus uincuemepanëdash. <sup>25</sup> Adembidi  
ëndenquimboshë tsusedpa Dabid padon Esus  
chuibanquin naden dada uapampic:

‘Con Icho abuc nidec bëyucanquid ëbëd tsadacim-  
boecsho isec nebi.

Aidi con dayun tsadquid icsho isquin natiaic  
cametequid dacuëdënenquio iquendambi.



26-27 Aid unēsash uincuente tantiec ëbitsen uincuenendabi, Papa, quec cuëdēnec bēdambo iquebi.

28 Nuquin Papa yacno tabadacpadec nidaidēn tabadquin ismiac

mibi yacno nidash mibēdi tabadec bēdamboshē iquebi mimbi camiaid iquendabi,

quequin Esus tantiaquin Dabid padon dada uapampic.

29 “Adomboen tantiaquin dada uash Dabid unēsacsho chococapampid nēbi shēcuë iquec.

30 Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ëndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon.

31 Aden Nuquin Papan nanun chiaid tantiaquin Esus uincuente isacbimboen dada uaquin, Nuquin Papan Chomiaid unēsacsho chococaqui aton nami chodquenquo yec uincuenendac, quequin chuiampic Dabid padon.

32 Ai, Dabid padon chiampicpadembi Nuquin Papan Esus uincuemepanēdash. Aid uincuemiash isondaic icquin mibitedi chuibanec nebi.

33 Aid uincuenash Nuquin Papan dayunquo tabadendac nēbi. Ambo choacsho matses tantiaquin Nuquin Mayan ma aibdēd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquiec onquesho nēbi mibitedishun tantiec.

34 Dabid padon nami chodquiash abuc nidambocpampic. Aden

aton namibi abuc indote chienquiocquin Esus  
chuiquin Nuquin Papan yuecquio icshun nanun  
chiaid naden Dabid padon chuibampampic:

‘Nuquin Papa Icbo Dapa icquin abipadquid icbo  
cain: Nēbi ēbēdi tsadec cho.

<sup>35</sup> Mibi chieshēnquido dēniacquidquio mibi icmenun  
nabono. Chiata,’

quequin Nuquin Papan nanun chiaid Dabid  
padon dada uapampic.

<sup>36</sup> “Aden tantiaquin Dabid padon chuipampid  
Esus mimbi cuesten dectanquin unēs uaid uin-  
cuemequin matses icsaid bedshunash abided  
cuidadquid Nuquin Papan icmepondash. Adoac  
ēmbi chiaid abimbo iqueque. Esus tantiaquidquio  
icta, isadaidbo —quepanēdash Petedo.

<sup>37</sup> Aden Petedon chuisho tantiash iccued-  
edquido abi icsaid tantiec unēsquio yec: —Esus  
tantianuequin ¿atotsi nuqui nape? —quepanēdash  
utsi-utsiec Petedobēdta Esusēn ēbi chuibeneta caid  
utsibo chiec.

<sup>38</sup> Adoaquien Petedo: —Mibi icsaid ēnshun,  
Esus con Icbombo nec, quequin abimbo tanti-  
aquin acten mentometa ma ēbi icsaid Nuquin  
Papa bēpiscudnu qeshun. Adoacsho aton Mayan  
mibi menendac. <sup>39</sup> Adembidi tantiasho isun min  
tsyuecquidtsen menendac. Adembidi nidaidtedi  
yacnocquidēn tantiasho isun aton Mayan me-  
neoaindac ambi chiampicpaden —quepanēdash  
Petedo Esus isquidquio.

<sup>40</sup> Aden chuibanequi: —Mimbi icsamboen tan-  
tiaid ēnta. Aden ēnash Esus tantiaquidquio icta —  
quequin chuibudquin Petedon ēmpanēdash.

<sup>41</sup> Aden chuisho tantiash, Tantiapiembi,  
quepanēdash utsi-utiec. Aid ushēmbi

dadpenquioshë tedes midted Esus tantiaquid yampanëdash. Adquid icsho isun acten mentobampanëdash.

*Esus tantiaquido iccuededaid*

<sup>42</sup> Adashic, Esus tantiembi, queboedo tantiabenabi iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepanëdash.

<sup>43</sup> Adec tabadcuededsho isash: —¡Padtembo! Dacuëdampambo iquec —quec utsibo tabadpanëdash. Adnubien Esusën ëbi chuibeneta caidon nadatiambocquin nabampanëdash. <sup>44</sup> Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanëdash. <sup>45</sup> Aton na menequin piucquid bedshun utsin na nibëdsho isun menepanëdash. <sup>46</sup> Adecbidi badiadquidën-badiadquidënquiec Nuquin Papa tabadte shubu uashunaid yacno nidash iccuededpanëdash. Adecbidi shubu utsi-utsiec yacno nidash iccuededquin Esus unësaid tantiaquin panëmpi cuësh-cuëshun peded-pededpanëdash. Adembidi bundoshon pebededoapanëdash. Adobanequi ëbi icsaid bedshunash Esus cuidadaid tantiec bëdambo iquebi, quec <sup>47</sup> Nuquin Papan naid chiec cuëdëncuededpanëdash. Adec tabadsho isash, Bëdambocquido nec, quec utsibotsen Esus tantiaquid yanash abi tantiaquid utsitedibëd iccuededpanëdash.

**3**

*Caputiapimbo icquid bëdamiaid*

1 Adnubien abi nidteniacpadën ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chiec nidpanëdash. 2 Ambo nidnubien caputiapimbocquid aid shubu shëcuë Bëdaidquio caid yacno utsibon buampanëdash. Anin tishacchobi yec caputiapimbocquid icpanëdash. Aidi badiadquidën-badiadquidënquien buandenequin aid shëcuë cuëmano nanded-nandedac uequimbi cho-chosho isun: —¿Adabi piucquid menetsia? —cabampanëdash. 3 Ambo Petedobëd Uan chosho isquin: —¿Adabi piucquid menetsia? —capanëdash caputiapimbocquidën uequin.

4 Adoaquien Uambëd nidtuidash nidquin Petedon: —Ëbi daëdi is —capanëdash caputiapimbocquid bëisquin. 5 Adoaquien, Ëbi menepashun, quequin abi daëdi isobien, 6 Petedon: —Piucquid con na nibëdec. Ëmbi tantiaidën ëbi tantiamebocpaden naimbique. Nasaded yacno iccondaidën Ësusën bëdamiacpadec bëdanash nidtoash nidec nid —capanëdash. 7 Aden chuiquin caputiapimbocquidën mëdante abiucquio bedtanquin Petedon nidtomiac badedquio nidtopanëdash caputiapimbochoedi. 8 Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon —quepanëdash. 9 Adec capusho isquidon nadobedpanëdash: 10 —Nuquin Papa tabadte shubu uashunaid shëcuë, Bëdaidquio caid yacno uetsequi,

Piucquid ěbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanēdash.

<sup>11</sup> Adec capuequi Petedobēdta Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash. <sup>12</sup> Adec tabadsho isun Petedon naden chuibampanēdash: —¿Atotsi quiash padtec quequin ěbi daēdi comapenen bēise? ¿Ěbi daēdshun nacta nēid capupadic? ¿Ěbi bēdambocquid icquindambi nadio? Padenquio. Nuquin tsusedpabon Papa caidēn bēdamiaid nec. <sup>13</sup> Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. <sup>14</sup> Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. <sup>15</sup> Abia uincuentequid mibi chuiquid dapa mimbi unēs uacshobien Nuquin Papan aidi uincuemepondash. Aid uincuenacsho ěbitedishun isondambi. <sup>16</sup> Esusēn ěbi bēdamepec, quequin tantiash nēid taē icsacboedēn Esus tantiash capusho mibitedishun isec.

<sup>17</sup> “Utsibo, Nuquin Papan chomiaid nec, quequin tantienquiocquin mibi chuiquidobēdtan

mimbi Esus unës uamiondac. <sup>18</sup> Ęmbi matses chuiquid dapa icmenu caid matsesën mëyanaid iquendac, quequin ambi chuimaidtedi Nuquin Papan dada uamampicpaden mimbi naondac. <sup>19</sup> Nēbi mimbi icsamboen tantiaid ěnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; <sup>20</sup> adecbidi ma ambi chuiquid dapa icmiaid Esus mibi bedmuen chomepanuna. <sup>21</sup> Nuquin Papan abitedi icsaisa icmete ushē choabicnuc ambi chiampicpadequi nēbi Esus abuc aton Papabēd tabadec. <sup>22</sup> Adembidi chuiquin Moisesën dada uampid nad iqueque. Tantiata:

‘Chuiquid Dapa ěbipadquid ambi chuimaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

<sup>23</sup> Ambi chiaid tantiesa Nuquin Papan nēsecaindac,’ quequin Moisesën dada uampic.

<sup>24</sup> “Adomboembidi Samuedēn chuibampampic. Adomboembidi Nuquin Papan chuimaid utsibon chuibanoampic. <sup>25</sup> Nuquin Papan chuimaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ěndenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ <sup>26</sup> Nuquin Papan Abadauan chiampicpadec aton tsyuecquid

choacsho mimbi unēs uapondac.  
 Aidi Nuquin Papan uincuemiāc ma  
 isadaidbomba abi icsaid ēnsho ma ambi  
 bēdambo icmiaid icpanuna —quepanēdash  
 Petedobēd Uan.

## 4

### *Ambi naid Petedobēdta Uan isadaidbo tsusiobon chuibamiaid*

<sup>1</sup> Aden Petedobēdtan Uanēn chuibanubien  
 isadaidbo tsusiobo cho-chopanēdash. Utsi-utsiec  
 Nuquin Papa tabadte shubu uashunaid yacno  
 cho-choquid bēdamboen tabadmequidquio icnubi  
 utsi-utsiec saduseyobo icpanēdash. <sup>2</sup> Esus unēs  
 uacsho Nuquin Papan uincuemiācpadembi  
 matsesten unēsacsho uincuemeoaindac, quequin  
 Esus chuibenequidon chuibanubi chopanēdash  
 aido. <sup>3</sup> Choshon Petedo Uambēdta bedash:  
 —Inchēsheque. Badiadshun nēidēn chiaid  
 tantianush nidnu. Nid —quianec puduanquimbi  
 Petedobēdta Uan quēnēn nauedmepanēdash  
 isadaidbo tsusiobon. <sup>4</sup> Aid daēdi bedabicnuc  
 Petedobēdtan Uanēn chuibansho tantiaquido  
 Esus tantiaquid dada dadpen sinco mīdted  
 yampanēdash.

<sup>5</sup> Adashic, badiadash isadaidbo chuiquido  
 yec tsusio utsibo yec abi ancaquido yec quec  
 Edusaden yacnoēsh iccuededpanēdash. <sup>6</sup> Nēidtedi  
 icpanēdash: ancanquid dapa daēd Anasbēdi  
 Caipas icpanēdash. Nēidic aton shubun icquido  
 abipadquido: nēidic Uan, utsibic Adecandedo,  
 aitedi cho-choash iccuededpanēdash.  
<sup>7</sup> Iccuededshumbic Petedobēdta Uan bēmeshun  
 nēnantanquio nidtomesun: —¿Tsutsi chuiquin

caputiapimbocquid bēdamio? —capanēdash tsusiobon.

<sup>8</sup> Adoaquien Petedo Nuquin Papan Mayanēn comapenen tantiamiac nadpanēdash: <sup>9</sup> — Caputiapimbocquid tantiaquin bēdamiaid isec ĵmitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata.

<sup>10</sup> Caputiapimbocquid Esuquidistu Nasaded yacno iccondaidēn bēdamiaid niosh. Mimbi unēs uacsho Nuquin Papan uincuemiaidēn nac nēid caputiapimbocboedi nēbi nidtoash capusho mimbi isec. <sup>11</sup> Aid bēdamequid mimbi tantienquo yaid Nuquin Papa yacno yuedanquidquo nec.

<sup>12</sup> Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

<sup>13</sup> Adec Petedobēd Uan dacuēdenquo yec comapenec onquesho tantiash tsusiobo: —Aid daēdi tsusiopenquo iquequi adecbidi Nuquin Papan chiampid tantiabenabicquid iquequi Esusbēd icquid aid daēd icquin ĵmitsipadomboen caputiapimbocquid bēdamepashba? —quec tantiadempambo yec tsusiobo tabadpanēdash.

<sup>14</sup> Aden ambi bēdameboed aidbēdi icsho isash, Icsamboen mimbi naoc, quetiapimbo tsusiobo tabadpanēdash. <sup>15</sup> Adshun Petedo Uambēdta nidmiash, Tiantanu, quec onquecuededec

tsusiobo: <sup>16</sup> —ĵMitsipadomboen aid daēd nuqui napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bēdanambo iquec, ēbitedi quetiapimbo iquebi. <sup>17</sup> Dadpenshun tantianushe



queshun, Esus padpiden chuibanoainda, quequin aid daëdi chuinuna —quecuededpanëdash tsusiobo. <sup>18</sup> Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

<sup>19</sup> Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiacpaden nadi? <sup>20</sup> Nuqui isboed nuqui tantiaboedbidi chuitequidquio iquendac —quepanëdash Petedo.

<sup>21-22</sup> Adoaquien: —Ëmbi chiacpaden nainquiosho isun mibi daëdi mëyantsiambique. Baded nid cueschitomane —capanëdash tsusiobon. Abi tishaid seta 40ted icquid caputiapimbocsho bëdamepanëdash. Aid Nuquin Papan bëdamiacsho isash utsibo cuëdëncuededpanëdash. Adsho tantiash Petedobëdta Uan mëyantiadquiocboedi adotiapimbo yec tabadpanëdash tsusiobo.

*Isadaidbo tsusiobon chiaid Esus tantiaquidon chuioaid Nuquin Papa chiaid*

<sup>23</sup> Tsusiobon nidmiac nidash iccueded-bocnombo choash puduedshun tsusiobon chuiboed Petedobëdtan Uanën chuioapanëdash.

<sup>24</sup> Adoac abentsëc onquiacbimboen naden Nuquin Papa chuipanëdash: —Con Icbombo mibi nec. Abubëdta nidaid acte chedo uashun aidënquio icquidtedimbo mimbi uabampampic.

<sup>25</sup> Adembidi ëndenquimboshë mimbi tantiacpaden min Mayanën tantiamiac mimbi chuimiaid, Dabid padon naden dada uapampic:

“¿Atotsieshumbini ëbi dëniactiapimbo icquidombi isadaidpembo comapenec nëishash ëbi

dëniacte buncuededpec? Adquiecbidi  
¿Atotsi quiash ëmbi chomiaid ic-  
samboen nanushbimboec isadaidbo  
onqueuidoapec?

<sup>26</sup> Ancanquidobëd chuiquid utsibo ëmbi chomiaid  
aton Icbobi mëyanuec iccuededec.”

<sup>27</sup> Ai, mimbi Dabid pado dada uamiampic-  
padembi ënabi Edusaden yacno isadaidpembo  
ancaquid daëd Edodesbëd Ponsio Pidato icnubi  
isadaidbo chedo iccuededquin mimbi Chomiaid  
icsaisa Esus icsa uanuec onquecuededpondash.

<sup>28</sup> Mimbi tantiampicpadembi unës uapondash,  
Papa. <sup>29</sup> Adquidën Petedobëdta Uan chushcasha  
mimbi tantioc. Cuesambocquid ëbitedi icmequin  
mimbi chiaid ëbi chuibame, Papa. <sup>30</sup> Icsaisan  
Esusën bëdamiacpaden nadatiambocquin naban,  
Icho —quepanëdash Esus tantiaquido Nuquin  
Papa caic.

<sup>31</sup> Adoac abi iccuededacno ishcutpanëdash.  
Adec ishcutnuc ambocquid Nuquin  
Papan Mayanën comapenen pausunac  
dacuëdenquiocquin Nuquin Papan chiaid  
chuibampanëdash.

### *Abentsëc yac bimboec tabadaid*

<sup>32</sup> Aden chuibanequi abentsëc onquiacbimboec  
tabadec Esus tantiaquido, Con na nec, quenquio  
yec, Nuquin Papan na nec, quec tabad-  
cuenepanëdash. <sup>33</sup> Adequi tabadcuenequimbi  
dacuëdenquiocquin, Esuquidistu uincuenacsho  
isombi, quequin chuibenepanëdash. Adec  
Esus tantiaquido tabadsho utsibon bëdamboen  
isbededquin aidën chuibansho bëdamboen

tantiapanēdash. <sup>34-35</sup> Adembidi nidaid icbo utsin-utsinguien aton nidaid menequin piucquid bedshun Esus chuibenequido menepanēdash. Adembidi, shubu icbo utsin-utsinguien aton shubu menequin piucquid bedshun meneoapanēdash. Aden meniac aton na nibēdquid icsho isun Esus chuibenequidon menebanac bunenquio tabadpanēdash. <sup>36</sup> Adecbidi ambo acte nēnantanquio nidaid nācnēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta, quedenesho Bednabe cuēmpanēdash. <sup>37</sup> Aidēmbi aton nidaid menequin piucquid ambi bedaidtedimbo Esus chuibenequido meneoapanēdash.

## 5

### *Ananiasbēd aton chido Sapida muaid*

<sup>1</sup> Adnubien dada utsi Ananias cuēmēdquid aton chido Sapidabēdtan aton nidaid menequin piucquid bedpanēdash. <sup>2</sup> Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniācbimboen menepanēdash Ananiasēn. <sup>3</sup> Adnubien, Piucquid abitedi meniācbimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin ¿mitsipaden tantiaquin Nuquin Papan Mayanēn isnubi mua uāquin ēbi menio? <sup>4</sup> ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid

bedaid mitsanapenquioda nediosh? Aidedi mitsana niosh. ¿Mitsipaden tantiaquin piucquid abitedi meniacbimboen meniano? Aden bëquin abimbo chienquiocquin Nuquin Papambobi mimbi mua uaboc <sup>5</sup> —Petedo qesho tantianec Ananias unësequi uebudpanëdash. Adsho isash Esus tantiaquidtedi dacuëdpanëdash. <sup>6</sup> Unësacsho isun dashcute cuëshën dataneshun buanshun caniabon chococatampanëdash.

<sup>7</sup> Bënë chococambic ushë abuctoan unësboedën chido aton bënë unësaid tantienquo yec choapanëdash. <sup>8</sup> Choasho isumbien: —¿Ada min nidaid menequin nëidtedi piucquid bedo? —Petedo qesho tantiashien:

—Ai, aidedi bedombi —quepanëdash Sapida.

<sup>9</sup> Adoaquien Petedo: —¿Nuquin Papan Mayanën ëbi muasho tantiapec, quequin tantienquiocquina min bënëbëdtambi min piucquid abitedi meniacbimboen meniano? Nëbi min bënë chococaboedon mibitsen buanendac —Petedo quenubic <sup>10</sup> Petedon tayumbi uebudec Sapida unëspanëdash. Aidtsen unësacsho buanshun aton bënëbëdtabi chococatampanëdash. <sup>11</sup> Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

*Bë-bëaidtedi bëdanaid*

<sup>12</sup> Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadatiambocquin nabampanëdash. <sup>13</sup> Adomboen nabansho isash Esus tantiesabo dacuëdec tacpan yacno chotiapimbo yequi: —Esus tantiaquido

bëdamboshë iquec —quecuededpanëdash.  
 14 Adec tabadequi utsi-utsiec dadpen dadabëdi chido Esus tantiaquido yampanëdash. 15 Adec Esus tantiaquid yanshun, Daicsaido Petedon bëndamepec, quequin tantiaquin daicsaido bë-bëshun Petedo capuacno nambededpanëdash. 16 Adembidi dëuequidon Edusaden yacno daicsaid bë-bënubi mayan icsan mëyanaido bë-bëoapanëdash. Aden bë-bëaidtedi bëdampanëdash.

*Esus chuibenequido tsusiobon quënë navedmi-aid*

17 Adnubien isadaidbo ancaquidbëd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nëishcuededpanëdash. 18 Adec nëishcuededshun Esus chuibenequido bedmeshun quënë navedmepanëdash. 19 Aid inchëshëmbi Nuquin Papan uaid mayan bëda choshon quënë shëcuë bëtashaid bëcadoquin abitedi puduemec: 20 —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

21 Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aidtedi. Chuibanubien isadaidbo tsusio dapan abëd icquidobëdtambi tsusio utsibotedi cho-chomeshun: —Esus chuibanquido bedtan —cac 22 quënë navedaid puduenushe quequin isquido chuiquid nidshun isquien Esus chuibenequido

nibëdec. <sup>23</sup> Adsho isash choaquin: —Quënë shëcuë bëdamboen bëtashquin quënë nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënë nauedaid puduenushe quequin isquido chuiquid. <sup>24</sup> Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. <sup>25</sup> Adnubien dada utsi choshon: —Mimbi quënë nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. <sup>26</sup> Adoaquien quënë nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bëapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëapanëdash.

<sup>27</sup> Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: <sup>28</sup> —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. <sup>29</sup> Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi. <sup>30</sup> Mimbi cuesten dectanquin unës uaondaaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. <sup>31</sup> Esus

uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna.  
<sup>32</sup> Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiaméoaic —quepanëdash Petedo.

<sup>33</sup> Aden Petedon chuisho tantiash tsusiobo: —Icsambo iquec —quiash Esus chuibenequido cuesunete bumpanëdash. <sup>34</sup> Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac <sup>35</sup> buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushe chiata. <sup>36</sup> Èdenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. <sup>37</sup> Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udastsen cuesuniac abëd icnëdaidtedi padpidec choenquio yec adecbidi udimbo nidanepanëdash. <sup>38</sup> Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën

naiduidtsëqui icnuc badedquio ënëndendac.  
<sup>39</sup> Aido Nuquin Papan namiac chuisho mimbi  
 ëmetiapimbo iquendac. Nuquin Papa chieshënushe  
 qeshun aido nidmeta.

<sup>40</sup> Aden Camadiedën chiac: —Adonona  
 —qeshun: —Buamboedo bëoata —cac  
 bëacsho cueshcanten cuesmepanëdash. Aden  
 cuestanquin: —Esus chuibanoainquio yec niddan  
 —qeshun puduemepanëdash. <sup>41</sup> Puduemiatic Esus  
 mëyanaid tantiec nidequi abi chuibansho mëyanaid  
 yec bëdambo iquebi, quec tabadpanëdash.  
<sup>42</sup> Adshumbic badiadquidën-badiadquidënquien  
 Nuquin Papa tabadte shubu uashunaid  
 yacnoshon matses bëyucanquin chuiquid, Nuquin  
 Papan bëdamboen isaidquio Esus nec, quequin  
 chuibampanëdash aidon. Shubu utsi-utsiec yacno  
 nidshun adomboembidi chuibenepanëdash.

## 6

### *Niante chidobo pete menebanquid icta caid*

<sup>1</sup> Adashic badiadquidën-badiadquidënquieci  
 Esuquidistu tantiaquid dadpen-dadpenquieci  
 yanubi isadaidbo quidiecon onqueten  
 onquequido comapenec onquec: —Niantebo  
 menenquiocquin pete mimbi uesquin pepaboc  
 —quepanëdash. <sup>2</sup> Adoquien Esuquidistu  
 tantiaquid utsibo abi yacno cho-chomiash  
 Esus chuibenequido 12ted: —Niantebo  
 pemebanuec Nuquin Papan chiaid chuibanquin  
 ëntiapimbo iquebique. <sup>3</sup> Niantebo meneta canuen  
 nadquidquio istuidshun chuita. Nuquin Papan  
 aton Mayan meniac tantiamiac bëdamboec  
 tabadsho mimbi bëdamboen isaidquio istuidta.



Adquid 7ted istuidshun, Niante chidobo pete menebanquid icta, cata. <sup>4</sup> Aidedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

<sup>5</sup> Adoaquien: —Mimbi bēdamboen chioc — quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquio Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. <sup>6</sup> Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

<sup>7</sup> Adashic Edusaden yacnoshon Esus chuibenequidon Nuquin Papan chiaid chuiban-chuibansho tantias̄h utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantias̄h Esuquidistu tantiaquido yampanēdash.

### *Esteban bedaid*

<sup>8</sup> Adnubien Nuquin Papan Mayan meni-aidēnquio. ambi comapenen tantiamiaidēnquio,

Estebanën nadatiambocquin ismebampanëdash.  
<sup>9</sup> Aden nadatiambocquin ismenuc bëdamboen tantienquoio yec utsibo comapenec onquecued-edpanëdash. Nëidic, Sidene yacnoësh choquido; utsibic, Adecandedia caid yacnoësh choquido; utsibic, Sidisia caid yacnoësh choquido; utsibic, nidaid Asia caid yacnoësh choquido aidtedi Edusaden yacno cho-choash tabadec Estebambëd comapenec onquepanëdash. <sup>10</sup> Comapenec onquequin Esteban Nuquin Papan aton Mayan meniaid icsho aidën comapenen tantiamiac onquesho dëniaquec utsibo onquetiapimbo icpanëdash. <sup>11</sup> Onquequin dëniactiapimbo icquin utsibo naden aidon chuipanëdash: — Tsusiobo naden chiec nidtan: Estebanën nuquin tsusedpa Moises caidën dada uampidbëdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanëdash. <sup>12</sup> Aden chiac tsusiobobëd Moisesën dada uapampid paquiacquidobëd isadaidbo utsibotedi nëishcuededshun Esteban bedshun tsusiobo iccuededacno buanquin yuedshun ismepanëdash. <sup>13</sup> Ambo abi dëniactiapimbocquidon Esteban muaquin chuita caboedon naden chuibededpanëdash: —Nëid dada Nuquin Papa tabadte shubu uashunaidbëdta Nuquin Papan Moises dada uamepampid ënenquiocquin muaquin chuibanec. <sup>14</sup> Naden Estebanën chioshe. Tantia: Nasaded yacno iccondaidën, Esuquidistu caidën Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidën

dada uampid naden nata quequin chiaid natiapimboctequid nec, quequin Estebanën chuibanosh, quequin muaquin chuipanëdash Esteban dëniactiapimbocquidon chomiaidon. <sup>15</sup> Aden Estebanën chiaid muaquin chuiquin naimbudquimbi tsusiobobëdtambi comapenen Esteban bëisquin Estebanën bëtantiate ushëbimboec ushumbo yec chënquesho isbededpanëdash.

## 7

### *Estebanën chuibanaid*

<sup>1</sup> Adec Estebanën bëtantiate ushëbimboec chënquesho isec tsusio dapambo Esteban chuiquin: —¿Abimboda mimbi naid chuiposh? <sup>2</sup>— caquien yuecquio onquequin Estebanën naden chuipanëdash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniaid matsesën istemaïd bëchomaoanquiec icquid Abadauan ismepampic. <sup>3</sup> Aden ismec nadec onquepampic: “Min utsitedi nianec nidaïd utsi yacno mibi ëmbi ismenu caid yacno nidta.” <sup>4</sup> Adsho tantiash Candeyabon nidaïd yacnoësh nidashic nidaïd Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocno Nuquin Papan nuquin tsusedpa Abadauan chomepampic. <sup>5</sup> Aden chomeshun Nuquin Papan naden Abadauan chuipampic: “Nëïd nidaïdën mibi capuacno mitsanapenquio nec. Yuecshun mibi menenun nanuna. Mimbi tishmiambocboedi min chidon

tishaid abentsęc min madombo nęid nidaid menendambi. <sup>6</sup> Nęid nidaid bedabi yec mimbi tishmiaidęn tishmiaid caidaido matses utsibon nidaidęn tabadendac. Ambo tabadshobi anocquidęn aido yuashun seta dadpen 400ted matamequin męyanendac. <sup>7</sup> Adoacsho aidotsen cuidquin męyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi męyanacnoęsh nidashic nęid macuęsh yacno choshon ęmbi chiacpadomboen nabanendac.” <sup>8</sup> Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuębędta dada caniaidtedi shui dębid dętemeta. Adobansho isun, ęmbi chiaid będamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanęn ambia dętemeshun dadatedi aidęmbidi shui dębid dętemeoapampic. Adoshombic yuecquio icshun Abadauanęn aton mado tishmeshun Isac cuęnquin 7tedec ushun Isaquęn shui dębid dętemeoapampic. Adoshombic adembidi Isaquęn aton mado tishacsho Acobo cuęnquin aidtedecbidi ushun Isaquęntsen Acobon shui dębid dętemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aidtedecbidi ushun aton madon shui dębid dętemeoapampic. Adoquien yuecash Acobon madotedi tsusiobudnepampic —quepanędash Esteban isadaidbo tantiamenu quequin chiec.

<sup>9</sup> Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa

cudasaidquio icsho isash nēishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneoapampic. <sup>10</sup> Adoac, Yuanu, qeshun natiamiaid Ose icsho isun Nuquin Papan aid dayun uaquin dacuēdenquio icmequin comapenen tantiaquidquio bēdamboen chuiquidquio Ose Nuquin Papan icmepampic. Adquidquio icsho isun Equipito yacnocquido ancaquidēn Padaon caidēn Equipito yacnocquido chuiquidquio Ose icmepampic.

<sup>11</sup> “Yuecash Equipito yacnocquido chuiquid, Ose, icnubi nidaid Equipito caid yacnocquidbēd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibēdquiec yampampic. <sup>12</sup> Adshumbic, Equipito yacno quēnē uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacadec pete bedec nidanepampic.

<sup>13</sup> Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimēdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquiochoedēmbi Padaonēn tantiabempampic. <sup>14</sup> Aton utsibo

Padaon chuibanshumbic Osen aton utsibo chuiquin: ‘Nuquin pabēdta nuquin matses bedtan,’ capampic. Adoac bedoanec Equipito yacno choapampic. Abēd icquido 75ted icpampic. <sup>15</sup> Adashic, Equipito yacno yuec tabadashi tsusio budashi Acobo unēspampic. Auēshquiobidi nuquin tsusedpabo Acobon madotedi adecbidi unēsoapampic. Unēsacsho Equipito yacno chococapampic. <sup>16</sup> Adashic, yuecquio yash Equipito yacnoēsh nidquin unēsaidon tishmiaid caidaidon aton mēdimbon canite buampampic. Canite buanshumbic Siquen caid yacno nidshun ēndenquimbo matses utsi, Amod caid, piucquid menequin tsusedpa Abadauanēn tied bedshunēdacno chococapampic.

<sup>17</sup> Aden chuishumbic Estebanēn nadopanēdash: —Equipito yacnoēsh tsusedpabo nidabi icnuc Nuquin Papan, Nidaid menenun nanuna, quequin chuipampid ushē chote anoentsēc yanuc nuquin tsusedpabo dadpen yanec caidpampic. <sup>18</sup> Dadpen caidsho isun Equipito yacnocquido ancaquid utsin Ose pado tantienquo icpampic. <sup>19</sup> Aidēmbi mua uaqin chuiquin natiamequin nuquin tsusedpabon dada bacuē tishacsho bedtemaid nec, quequin nemepampic. <sup>20</sup> Adnubien dada bacuē Moises tishacsho Nuquin Papan, Aid bēdaidquo iquec, quequin ispampic. Aidi icucshun ushē abentsēc choaid nidmequin Equipito yacnocquido ismenquiocquin aton mado Moises anin ompopampic. <sup>21</sup> Ompoaqui Moises shubisho tantiashun tsitsan ambi danoshcaidēn aton mado acte nantan anin nuntampampic. Aden

nuntanambien Equipito yacnocquido ancaquidën champi nesec budquin tsitsanën Moises noadsëcsho istuidshun bedash, Con mado caimbi, quepampic ancanquidën champi. <sup>22</sup> Bedsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

<sup>23</sup> “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiado con matses isnu, quianec aton matses chonoadacno nidquin Moisesën istuidpampic. <sup>24</sup> Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneoapampic. <sup>25</sup> Ëmbi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquieq nidnubi aton matsesën tantienquio icpampic. <sup>26</sup> Badiadash aton matses yacno padpidec nidquin aton matses daëd cuesnansho istuidshun, Ëmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. <sup>27</sup> Adoaquien Moises cuëscatanec: ‘¿Ëmbi nasho cuidquin ëbi chuiquid tsuntsin mibi icmioshe? Chui. Tantianu,’ quetanequi: <sup>28</sup> ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. <sup>29</sup> Aden chuisho tantiashien, Equipito yacnocquido ancaquidën tantianushe quianec dacuëdec

Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

<sup>30</sup> “Adashic, seta dadpen 40tedbidi matamec nidaid Madian caidën tabadec cuëtempiuidquio yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiacbimboecquid nënantanquio Nuquin Icbon Chomiaid tabadsho Moisesën ispampic. <sup>31</sup> Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic: <sup>32</sup> ‘Min tsusedpa Abaduanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec istiapimbo yec Moises nidtuidpampic. <sup>33</sup> Nidtuidsho isec Nuquin Icho Moises chiec nadpampic: ‘Nëmbo ëbi icsapenquio icquid icnuc caputemaid nidaid iqueque. Min tapucudte chicshun tantiata. <sup>34</sup> Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icho Moises chiec.

<sup>35</sup> “Aden cuëtempi nëdënquiacbimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: ‘ÿEmbi naid icsho cuidquin ëbi chuiquid tsuntsin mibi icmioshe? Chui. Tantuanu,’ abi caondaïdo bëyucanquin buanquid Moises icpampic. <sup>36</sup> Adquid



Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniacnoshontsen nadatiambocquin nabanquin isadaidbo Moisesën ismeoapampic. <sup>37</sup> Aidëmbi naden chuipampic: ‘Yuecquio icshun ëbipadquid mimbi tishmiaidën tishmiaidon caidaid Nuquin Papan chuiquidquio icmendac,’ quequin Moisesën chuipampic. <sup>38</sup> Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic. <sup>39</sup> Aden aid dada uaid bedshun bëyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. <sup>40</sup> Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuibededpampic: ‘¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacnenta. Nacnenash bëyucanquin chuiquid aid iquendac,’ tsusedpabon cac <sup>41</sup> bacan bacuëbimboecnuc Adonën nacnempampic. Ambi nacnenaid tantiaquin isadaidbon nidaidën capuquid yua

cuesuneshun cuädēnēmbēdēdpampic. <sup>42</sup> Adquid cuädēnēnsho tantiaash isadaidbobēd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ēndenquimbo tantiaquin naden chuipampic: ‘Adomboen mimbi nacnenaaid tantiec tabad.’ Adembidi Nuquin Papan yuecquio icshun nanun chiaid isadaidbo chuiquin naden dada uamepampic:

‘¿Matses utsi nibēdquio yacnoshon seta dadpen 40ted matamequin ēbi tantiaquinda nidaidēn capuquid yua cuesuneshun pambid tauidenio? Padenquio.

<sup>43</sup> Ēmbi uaid badiadēn ushē, ēbitedishun bēyucamēmbi, qeshun aidpadquid nacnenshun Modoc cuēnquin aton shubumpi nuntan namposh.

Aidbēdtabi uispa dapatsen ēbitedishun bēyucamēmbi, qeshun aidpadquidbidi nacnenshun Dempan cuēnec danēshēn sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ēmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquio icquidobi Nuquin Papan chuipampic — quepanēdash Esteban isadaidbo chiec.

<sup>44</sup> Aden chiec yuec onquebudec: —Matses utsi nibēdacnombo nidanequin tsusedpabon Nuquin Papa tabadte chicbanshun buampampic. Aidēmbi Moises ismiacpadēmbi isadaidbon Nuquin Papa tabadte shubu uashumpampic. <sup>45</sup> Adashic,

tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacennoanubien isadaidbo chuiquid dapa nuquin tsusedpa Dabid yampampic. <sup>46</sup> Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic. <sup>47</sup> Aid shubu uabi Dabid unësambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. <sup>48</sup> Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuipampic: <sup>49</sup> “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac. ¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac? <sup>50</sup> ¿Tauaquioquimbi abitedi uambodambi ictionda?” quequin Nuquin Papan chuimiaidën dada uapampic —quequin chiashic Esteban abi onquec: <sup>51</sup> —Pacuënëdacbimboen Nuquin Papan chiaid tantiash icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. <sup>52</sup> ¿Nuquin Papan ambi yuecquio icshun naden nanuna quequin

chiaid ambi chuimiaidtedi min tsusedpabon mēyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unēs uamiondac. <sup>53</sup> Nuquin Papan chiaid ambi uaidon mayan bēdabon meniaqui Nuquin Papa chieshēnquido mibi nec —quepanēdash Esteban isadaidbo chuiquin ēnec.

### *Esteban se-siaid*

<sup>54</sup> Adec Esteban onquesho tantishun nēishēnshun Esteban iccuededquidon chushcapanēdash. <sup>55</sup> Adoaquien Nuquin Papan Mayan meniaidquio icquin Estebanēn abuc isquin Nuquin Papa uēshēmbō yec matsesēn istiapimbo bēchomaoanquieic ictequid abichobi dasiuidteniaid chēnquenubi Nuquin Papabēd tancandaēdquieic Esuquidistu nidtuidsho ispanēdash. <sup>56</sup> Aden isequi: —Abuc shēcūē uaid shēcniaye. Is. Umbo Esuquidistu, matsesondaid, Nuquin Papabēd tancandaēdquieic tsadsho isembi —quepanēdash Esteban.

<sup>57</sup> Adsho tantish tsusiobo comapenec sidquianec pamumēdanec titinquequin Esteban bedshun <sup>58</sup> cuēnoten se-senuen shubu nibēdacno udi buampanēdash. Aden Esteban buanshun aton dashcute Saudo cuēmēdquidēn taēno sampanēdash Esteban se-senuequidon. <sup>59</sup> Sanshun se-siaquic Estebanēn Esuquidistu cuēnquin naden chuipanēdash: —Ēbi yued, Icho —quiashic, <sup>60</sup> danēshēn sebudash comapenec nadec onquec: —Ēbi se-sequido icsaid cuidenquio yec bēpiscudta,

Ichbo —quepanēdash. Adec onquetanec Esteban unēspanēdash.

## 8

### *Saudon Esus tantiaquido mëyanaid*

<sup>1</sup> Esteban se-senu caquien, Ai, adota, quiash isec uano Saudo tsadpanēdash. Esteban se-siaid ushēmbi Edusaden yacnoshon Saudon Esus tantiaquid utsi-utsien comapenen mëyanquin tauadopanēdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoc nidaid Udeya yacno utsi-utsiec choash tabadnubien Samadia caid yacno choash utsibo tabadoapanēdash. <sup>2</sup> Adnubien Nuquin Papan chiacpadomboen naquin Esteban chococaic comapenec sedenquec shubipanēdash. <sup>3</sup> Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabēdtabi chido chedo bedmeshun quēnēn nauedmeapanēdash.

### *Samadia yacnoshon Esus chuibanaid*

<sup>4</sup> Adashic Edusaden yacnoēsh nidanec shubu dadpen icquid utsi-utsiec yacno choshon abi tantiaquidon Esus chuibenapanēdash. <sup>5</sup> Adembidi niante chidobo aton na nibēdsho menequid, Uedipe cuēmēdquid nidaid Samadia caid yacno choshon adembidi Esus chuibanoapanēdash. <sup>6</sup> Aidēn nadatiambocquin nabanquin Esus chuibansho ambocquido iccuededquin bēdamboen tantiapanēdash. <sup>7</sup> Aidēmbi nadatiambocquin nabanac mayan icsa

dapuduedaid icboedi mayan icsa sidquianec cuempanēdash. Adecbidi canite icsaidbēdta caputiapimbocquid dadpen bēdampanēdash. <sup>8</sup> Adsho isash Samadia yacnocquido, Bēdambo iquebi, quec tabadpanēdash.

<sup>9</sup> Adnubien Samadia yacno ĕnden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. <sup>10</sup> Adosho

isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdta abi chuiquidon comapenen tantiapanēdash.

<sup>11</sup> Aden yuen Simonēn ismiac, Isnuequid dadpen badiadquidēn-badiadquidēnquiec abi yacno choash iccuededpanēdash. <sup>12</sup> Adnubien, Nuquin Papa

yacno puduedmianquid Esus nec, quequin Uedipen chuibansho tantiaquid yampanēdash dadabēdi chido chedo. Adsho aidtedi acten mentomepanēdash. <sup>13</sup> Simontsen: —Esus

tantiaquid nebi —quesho acten mentoacqui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

<sup>14</sup> Adashic yuecash Samadia yacnocquido Edu-saden yacno nidash nadpanēdash: —Nuquin Papan chiaid Samadia yacnocquidon tantiabed-edec. Aden chuisho Esus chuibenequidon tantiashun Uambēdta Petedo Edusaden caid yacnoēsh nidaid Samadia caid yacnoshon nidmepanēdash.

<sup>15-16</sup> Adec aid daēd nidaneshun: —Esus tantiaquid acten mentoaidoudi nēidtedi nec —anocquido quesho tantiashun: —Nēidtedi min Mayan mene,

Papa —quec onquequin <sup>17</sup> Petedobëdtan Uanën mēdanten Esus tantiaquido mamishbampanēdash. Aden mamishbanubi aidtedi Nuquin Papan aton Mayan menepanēdash.

<sup>18</sup> Aden Petedon nasho isash Simon: — Ma adquiec mēquiadnueshun mibi piucquid menenu. <sup>19</sup> Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanēdash.

<sup>20</sup> Adoaquien Petedo: —¿Piucquid menecta mibi mēquiadpe? Adoquin mimbi tantianuc tauianti-adpambo chian anēdēnquiacno ma mibēdi min piucquid icpanu. <sup>21</sup> Mimbi Nuquin Papan chiaid icsamboen tantiaquin ëmbi nacpadomboen nati-apimbo mibi iquendac. <sup>22</sup> Mimbi icsamboen tantiaid ënta. Aden icsaid ënsho isash Nuquin Papa mibi icsaid bēpiscudendac. <sup>23</sup> Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

<sup>24</sup> Adoaquien: —Ëbi tauiantiadpambo chian anēdēnquequid nēnenushe quiash mibi Uambëd Nuquin Papa chiec bēdamboec onquebudneta —quepanēdash Simon.

<sup>25</sup> Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanēdash aidëmbidi.

*Uedipe Etiopia caid yacnocquidbëd icaid*

<sup>26</sup> Adoshombic, Samadia yacno Uedipe icsho Nuquin Papan uaid mayan bēdan nadopanēdash:

—Nëuëshquio puduanec nidec Edusaden datam-bidanec acte dapa yacno shubu dadpen icquid Casa caid yacmi matses nibëdacno podquedën nidash niduntanec chotan.

<sup>27</sup> Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëquedtuipänëdash. Ancanquid chido Candase cuëmëdquid aton na dayun uashunquid aid dada nepanëdash. Aidi Edusaden yacno nidash tabadquin Nuquin Papa chianec <sup>28</sup> padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. <sup>29</sup> Adnubien Nuquin Papan Mayanën: —Nidaid cano chinunta —cac <sup>30</sup> Uedipen titinquequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequina tantaquie? —quepanëdash Uedipe.

<sup>31</sup> Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtopanëdash.

<sup>32</sup> Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.



33 Aidi Icsaisa icsho mëyansho isec, Icsambocquidta neque. Isnu, quenquiocposh aton matses.

Aidi chido inesa yec ambi tishmiaid nibëdnuc  
¿Tsuntsin ambi naid chuipadic?”

34 Aidedtedtsëqui abi isec onqueboed Uedipe ismeshun Etiopia yacnoësh choquidën: —Ëbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibanegue? Ëbi chui. Tantuanu —capanëdash Etiopia yacnoësh choquidën Uedipe chuiquin.

35 Adoaquien, Matsestedi icsaid bedshunash abided ciudadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibampanëdash Uedipen.

36 Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

37 Adoaquien Uedipe: —Esus tantiaquidquio nebi, qesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —qeshun Etiopia yacnoësh choquidën: 38 —Niduid —cac nidaid cano nidmequidën cabayo nidtuidmian acte budshun Etiopia yacnoësh choquid Uedipen mentopanëdash. 39 Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

<sup>40</sup> Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

## 9

### *Saudon tantiate paucaid*

<sup>1</sup> Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cunesunemetiadquio yec isadaidbo chuiquid dapabo yacno Saudo choash <sup>2</sup> shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanëdash Saudon.

<sup>3</sup> Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. <sup>4</sup> Aden dëcatiac Saudo paëdash uesho isun nadec abucuësh onquec: —Saudo, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

<sup>5</sup> Adoaquien: —Icho, ¿Tsutsi mibi ne?

<sup>6</sup> Adoaquien: —Mimbi mëyanaid Esus nebi. Ëmbi chiaid chïeshë nec mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

<sup>7</sup> Adec abucuësh onquenubi Saudobëd chochoquido nidtuidshun tantiequi onquequid isenquo yec tabadtuidpanëdash. <sup>8</sup> Onquec ënëdan nidtoash Saudo istiadquo iquequi bëshupanëdash. Adsho isun mëdïnanquin Damasco yacno buampänëdash. <sup>9</sup> Adequi Damasco yacno choash 3tedec ushec isenquo yec buna mëmunquiec Saudo tsadpanëdash.

<sup>10</sup> Adashic, Saudo puduedash tabadacno ëdibictëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia—caquien:

—¿Atoda? Nëbi uebi, Icbo —quepanëdash Ananias.

<sup>11</sup> Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiec onquec tsadsho mimbi istuidendac. <sup>12</sup> Adec aid ushacbimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan—capanëdash Esusën.

<sup>13</sup> Adoaquien: —Con matses dadpenshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. <sup>14</sup> Aidbidi Edusaden yacnocquido chuiquid dapanquo dada uaid sananquin nëmbotsen mibi tantiaquido

bedmeshun tanemenuec aidi chopac caosh — quepanëdash Ananias Esus chiec.

<sup>15</sup> Adoaquien: —Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac. <sup>16</sup> Ëbi chuibenesho mibi mëyantequid iquendac, quequin Saudo tantiamembi — quepanëdash Esus.

<sup>17</sup> Adsho tantianec Ananias nidash Udasën shubun puduedshun Saudo mamishec: —Con utsi, mibi podquedën chosho chuiquidën Nuquin Icbonquio, Esusën mibi padpiden ismenuen Nuquin Papan Mayan mibi menenuembidi chomiaid nebi —quepanëdash Ananias Saudo chiec.

<sup>18</sup> Aden Ananiasën chuinubi nuëcquid bitsi-bimboecquid ëshënuësh paëdnubi bëshuacboedëmbi, Saudon, bëdamboen ispanëdash. Aden isec capusho isun acten mentopanëdash. <sup>19</sup> Adecbidi Saudo penquio yec padishacboedi piash padpidec uidëncuenoapanëdash.

### *Damasco yacnoshon Saudon Esus chiaid*

<sup>20</sup> Adeç uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanëdash Saudon. <sup>21</sup> Aden chuisho tantiash tantiadempambo yec tabadec: —¿Edusaden yacnoshon Esus tantiaquido mëyameboedida nec? ¿Adecbidi nëmbo choshon

tanemeshun isadaidbo Edusaden yacnocquido chuiquid dapabo yacno buamenuc choabida ictic? —quepanēdash Damasco yacnocquido.

<sup>22</sup> Aden anocquidon tantianubi Nuquin Papan Mayanēn oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuded-chudedpanēdash.

*Isadaidbo Esus tantiesa abi cuesunete bunsho isash Saudo cuenaid*

<sup>23</sup> Adembidi yuec ushquin Saudon ēnenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidēn chuisho Saudon tantiapānēdash.

<sup>24</sup> Adnubien Saudo cuesunenuen shubu dadpen icquid abichobi tsicatequin daquēnē uaidēn shēcuē cuēmanoshon abi chieshēnquidon caimpanēdash Saudo puduensho bednu quequin.

<sup>25</sup> Aden cainsho isun Saudo cuesunenushe qeshun chiac inchēshēmbi onquenquiocquin tsitsan dapan Saudo antsaduntanquin tsicatiaid quēnē cachoc Saudo budmepanēdash.

<sup>26</sup> Budanec Saudo Edusaden yacno nidoash Esus tantiaquidobēd tabadnuesho isash, Saudon mua uaquin ēbi bednushe quiash dacuēdcuededpanēdash aido.

<sup>27</sup> Adnubien, Saudobēd Esus tantiaquid utsitedi yacno choshon Bednaben yuedpanēdash. Aden yuedshun: —Saudon Damasco yacno nidquin Nuquin Icbo ispac caosh. Nuquin Icbo Saudobēd onquepac caosh. Adanec Damasco yacno choshon dacuēdenquiocquin Esus chuibampac caosh, quequin Saudon naid Bednaben

chuiampanēdash. <sup>28</sup> Aden Bednaben chuibanac Esus tantiaquido Saudo dacuēdenquiocnobi aidobēdi capuquin Saudon anoshombidi Esus chuibanoapanēdash. <sup>29</sup> Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuquin aidontsen cainoapanēdash. <sup>30</sup> Aden Saudo cuesunenuen, cainec quesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsēqui nidmepanēdash.

<sup>31</sup> Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuēdenquio yec tabadpanēdash. Adec tabadquin, Nuquin Papan chiaid tantiabenu, quesho Nuquin Papan Mayanēn adomboembidi tantiamiac bēdamboec tabadpanēdash. Adec tabadquin Esus chuisho tantiesa icboedi Esus tantiaquid dadpenquio yampanēdash.

### *Petodon Ananias Dodcastsen bēdamiaid*

<sup>32</sup> Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. <sup>33</sup> Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: <sup>34</sup> —Esusēn mibi bēdamiaque. Nidtoшон min uete buanun nacentā, Eneyas —Petedon cac Eneyas badedquio nidtoash capupanēdash. <sup>35</sup> Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

<sup>36</sup> Adnubien Dida uditsēc shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdambocquid icquin badiadquidēn-badiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. <sup>37</sup> Aidi Petedo Dida yacno icnubi icsabudec unēso isun abēd icquidon dapanshun shubu abuc quēnē icquidēn nampanēdash. <sup>38</sup> Aden nanshun, Petedo Dida yacno tabadec, qesho tantiashun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidenquio yec badedquio ēbēdi cho —cac <sup>39</sup> abēdi badedquio Ope yacno Petedo nidpanēdash. Adec nidec Ope yacno chosho isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

<sup>40</sup> Adosho isun abitedi puduemiash danēshēn sebudash Nuquin Papa chiec onquetanec nidtoshon unēsboed isquin: —Nidto, Dodcas —Petedon cac uincuenequi Petedo isec Dodcas badedi uētsēdtopanēdash. <sup>41</sup> Uētsēdtosho isun mēdinquin nidtomeshun niantebobēdta Esus tantiaquid utsibo cuēnquin cho-chomeshun uincuenboed ismepanēdash. <sup>42</sup> Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. <sup>43</sup> Adnubien Petedo Ope yacnocquid nidaidēn capuquid bitsi uashun chodcashun nacnenquid Simombēd yuec Petedo

tabadpanēdash.

## 10

### *Petedo Codnedion chomiaid*

<sup>1</sup> Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēsh Sesadeya caid yacno choash tabadpanēdash. Aidi sondado dadpen 100tedi chuiquid icpanēdash. <sup>2</sup> Aidi aton shubun icquidobēdi Nuquin Papa tantiaquid icquin isadaidbo aton na nibēdquid icsho isun menebanquid icpanēdash. Adecbidi Nuquin Papa chiec onquianedenepanēdash. <sup>3</sup> Adquid yec ushē budtsambi tedes yanuc Nuquin Papa chiec onquequimbi ushac bimboecquin Nuquin Papan uaid mayan bēda Codnedion ispanēdash. Nuquin Papan uaid mayan bēda choshon: —Codnedio —capanēdash.

<sup>4</sup> Adsho tantiash dacuēdquin comapenen isec: —¿Atotsibi name, Icbo? —quepanēdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibēdquid tantiaquin menedenequid mibi icsho Nuquin Papan bēdamboen isaid mibi neque. Chuinu. Tantiata. <sup>5</sup> Nēbi Simon cuēnshumbic Petedo cuēnoaid ma bednu mimbi namiaido Ope yacno nidmetan. <sup>6</sup> Simon utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec —quepanēdash Nuquin Papan uaid mayan bēda Codnedio chiec.

<sup>7</sup> Aden chianec Nuquin Papan uaid mayan bēda nidambi Codnedion aton yua daēdbēdta sondado



abentsëc chomeshun <sup>8</sup> Nuquin Papan uaid mayan bēdan chuibocpaden Petedo bedmenuen ambi namiaido Codnedion nidmepanēdash.

*Petedon ushacimboec tsadquin isaid*

<sup>9</sup> Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuec shubu macano pada-padapambocquid yacno dectatopanēdash. <sup>10</sup> Adec dectatoash shubu icbon codocanubi Petedo bundoec ushacimboec tsadquimbic <sup>11</sup> abu posonianec abi yacmi dabidiete dapabiecquid bucun dēnēshbudcuenaaid budsho Petedon ispanēdash. <sup>12</sup> Aidēnquio ambi petequid ambi petemaid chedo nidaidēn capuquid tacbidēn capuquidbēd podochoquid chedo antabēdpanēdash. <sup>13</sup> Adnubien: —Nidtoшон cuesuneshun pe, Petedo —capanēdash abucuësh onquequin.

<sup>14</sup> Adoaquien: —¿Abida cai? Ëmbi petemaid tauishun mibi shēdmetemaidquio antabēdquid nec. Adquid piamboccombi, Icbo —quepanēdash Petedo.

<sup>15</sup> Adoaquien padpidec abucuësh onquec: —Nuquin Papan bēdambo icmiaid icsambo iquec cainda —quepanēdash. <sup>16</sup> Adotanquimbic antabēdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeoapanēdash.

<sup>17</sup> Adosho isash Petedo ambi isboed tantiec tsadnubi Codnedion chomiaido Simonēn shubu istuidash shëcuë cuēmano choec nidtuidpanēdash.

18 Choec nidtuidash: —¿Nëmboda Simon Petedo tabadec? —quetuidpanëdash.

19 Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. 20 Ëmbi chomiaido neque. Budash cacuidenquo yec aidobëdi nidtan —capanëdash.

21 Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

22 Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdambocquidquo nec. Adquid icquin Nuquin Papan chiacpaden nabansho isun isadaidbon bëdamboen isaidquo nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioaposh —quepanëdash Codnedion chomiaido Petedo chiec.

23 Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash.

24 Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. 25 Aden iccuededmiac

tabadnubi utsibobëd choec Petedo chedo puduedsho isash, Mibi bëdambocquid icnubi adesa nebi, quequin Petedo ismec danëshën sebudec

shuebudash Petedo bëisenquo yec Codnedio uepanëdash.

<sup>26</sup> Adec uesho isash Petedo: —Mibipadquid nebique. Nid tota —quepanëdash Codnedio caic.

<sup>27</sup> Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash. <sup>28</sup> Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac <sup>29</sup> mimbi ëbi bedmiaido choacsho isash, Mibëd capuesa nebi, quenquo yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquo yec puduedobi. Nëbi Tantianu. Chui. ¿Atotsieshun ëbi chomio? —quepanëdash Petedo Codnedio chiec.

<sup>30</sup> Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bed-bedquiacbimboec dasiuidquid ëbi yacmi Nuquin Papan budmiac onquec: <sup>31</sup> “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquo icquin tantiec. <sup>32</sup> Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono queshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec.

Aidën shubu acte cuëmambi iquec,” quec Nuquin Papan uaid mayan bēda onqueposh. <sup>33</sup> Aden chiac: “Petedo bedtan,” quequin ëmbi namiaido nidmiombi. Adoac bēdambocquid yec cacuidanenquio yec badedquio mibi choc. Adec mibi choacsho isash bēdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanēdash Codnedio Petedo chiec.

*Codnedion shubu nuntanshun Petedon chuibanaid*

<sup>34</sup> Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiembi. <sup>35</sup> Nuquin Papan chiaid tantiashun matses utsin-utsinquien chieshēnenquiocquin bēdamboen nabansho isun, Aidtedi Nuquin Papan abi yacno yuedendac, quequin tantiembi. <sup>36</sup> Ēendenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuiquid icnubi utsibēd bēdamboec tabadendac. <sup>37</sup> Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. <sup>38</sup> Ma abēd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bēdamboen nabanquin abi chieshēnquidën Satanas caidën mëyanaido Esuquidistun

bëdamebampondash. Adosho mibitedishun isbampondac. <sup>39</sup> Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unës uaqui <sup>40</sup> uincuenash, Uincuenobi, quequin Esuquidistun ismebempondashi. <sup>41</sup> Aidi uincuenshun matsesedi ismenquiocquin aidbëdtan peshun acquidotedictsëqui Esuquidistun ismepondashi. <sup>42</sup> Abëdi icshobi, Èbi chuibanquin matses icsaid cuidte chuibante ushë choec quequin chui, cac nebi. <sup>43</sup> Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uapampic —quepanëdash Petedo Codnedion shubun iccuededquido tantiamequin chiec.

*Isadaidpembo Nuquin Papan aton Mayan meni-aid*

<sup>44</sup> Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash. <sup>45-46</sup> Aden meniac isadaidpembo nëbi Esuquidistu tantiaquido yanshun abi onquiacmaidënquio utsin onqueten onquequin Nuquin Papa chiec cuëdëmpanëdash. Adsho tantiash Petedobëd cho-choboedo isadaidbo aton tsusedpabon nacpaden shui dëbid dëtemequido: —¡Padtec! Tantiadempamboctequid nec. Isadaidpembotsen

Nuquin Papan aton Mayan meniac — quepanēdash isadaidbo Petedobēd cho-choboedo.

<sup>47</sup> Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? <sup>48</sup> Aid, acten mentometa —capanēdash Petedon.

Aden acten mentoaqui: —Nuquibi tabadnuna —cac Petedobēd cho-choboedo acten mentoaidobēd daēdpactsēc ushec tabadpanēdash.

## 11

### *Isadaidbo Petedon ambi naid chiaid*

<sup>1</sup> Adnubien utsibo Sesadeya caid yacnoēsh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bēdamboen tantiaish Esuquidistu tantiaquido yanosh, quequin chuipanēdash. Anoshon chuibētsenec Edusaden yacnotsen choshon adomboembidi chuiopanēdash. <sup>2</sup> Aden chuisho anocquidon Esuquidistu tantiaquid utsibon tantiaish tsusedpabon chiacpadomboen shui dēbid dētemequido yec Petedo nēmbo choacsho isun, Aidi ambi nabanaid chuimenu, quequin cainpanēdash. Aden cainubic Petedo choacsho isash <sup>3</sup> comapenec onquecuededec: —Isadaidpembo shui dēbid dētemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantianu —quepanēdash Edusaden yacno tabadquido.

<sup>4</sup> Adoaquien Petedon nadopanëdash: —Aidobëd ëbi tabadboed chuibanu. Tantiata. <sup>5</sup> Ope yacnoësh Nuquin Papa chiec onquequin ushac bimboen naden ispombi. Abuc posonianec ëbi yacmi dabidiete dapabiecquid dënëshbudcuenaïd budposh. <sup>6</sup> Aidënquio nidaidën capuquid tacbidën capuquidbëd podochoquid chedo antabëdsho ispombi. Aidën antabëdquid nuqui petequidbëd nuqui petemaïd icposh. <sup>7</sup> Adquid icsho isnubi: ‘Nidtoшон cuesuneshun pe,’ caposhi. <sup>8</sup> Adsho tantiashun: ‘Aidtedi ëmbi petemaïd tauiquin mibi shëdmetemaïdquio nec. Adquid pesambo nebi, Icho,’ capombi. <sup>9</sup> Adoaquien abucuësh padpidec onquequin: ‘Nuquin Papan bëdambo icmiaïd icsambo iquec cainda,’ caposhi. <sup>10</sup> Adomboembidi abentsëc chotsëcnuc tabëcaïdo abuc buanshun padpiden budmeshun adembidi chuishun buanshun abitedi abuc puduedmeoposh. <sup>11</sup> Abuc buanoabombic dada abentsëc chotsec Sesadeya caïd yacnoësh choquido shubu shëcuë cuëmano nidtuidash nidpac caosh. <sup>12</sup> Aidtedi icnubi Nuquin Papan Mayan: ‘Aidobëdi cacuidenquio yec nidtan,’ qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. <sup>13</sup> Puduedacsho isash Codnedio: ‘Nuquin Papan chomiaïdën ambi uaid mayan bëdan naden chuiposhi: Simon cuënshumbic Petedo caïd Ope yacno tabadeque. Aid bedmëuen mimbi namiaïdo nidmeta. <sup>14</sup> Aidëmbi mibëd icquidtedi Nuquin Papa yacno puduedmianquid chuibanendac, quequin Nuquin Papan uaid

mayan bēdan chuiposhi,’ quequin Codnedion chuioposhi.

<sup>15</sup> “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. <sup>16</sup> Aden meniacsho isun Nuquin Icbo Esuquidistun chiondaid ëmbembi tantiatsëcquieic tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icbo Esuquidistun. <sup>17</sup> ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? — quepanëdash Petedo shui dëbid dëtemequid utsibo chieic.

<sup>18</sup> Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Papan naid chieic.

*Antioquiya yacnoshomba Esus tantiaquido iccuededaid*

<sup>19</sup> Esteban cuënoten seshuniash: “Esuquidistu tantiaquido cuesunenu,” quesho tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidaneapanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacnëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanapanëdash. <sup>20</sup> Adshumbic,



utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibampanëdash.

<sup>21</sup> Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Èbi icsaid ënu, quequin ënash Esuquidistu tantiaquid dadpen yampanëdash.

<sup>22</sup> Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash.

<sup>23</sup> Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiata —quepanëdash Bednabe.

<sup>24</sup> Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanëdash.

<sup>25</sup> Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon <sup>26</sup> Saudo istuidash Antioquiya yacno aidbëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho

isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpanëdash.

<sup>27</sup> Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquio icshun nanun chiaid chuiquido cho-chopanëdash. <sup>28</sup> Chochoshon abentsëqui Accabo cuëmëdquid Nuquin Papan Mayanën oncamiac: —Yuec-yuecpectsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanëdash.

<sup>29</sup> Adnubic, Udeya yacnocquidon pete nibëdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash. <sup>30</sup> Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëdta Saudo menequin Edusaden yacno buamepanëdash Antioquiya yacno tabadquin Esus tantiaquidon.

## 12

*Acobo cuesuniaidbëdta Petedo quënën nauedaid Nuquin Papan puduemiaid*

<sup>1</sup> Adnubien Edusaden caid yacno tabadquid domanobo ancaquid Edodes cuëmëdquidëmbi

Esuquidistu tantiec iccuededquido utsi-  
 utsien comapenen mëyanuequin bedmeshun  
 quënën nauedmepanëdash. <sup>2</sup> Aido quënën  
 nauedmeshun Esuquidistun ëbi chuibeneta  
 caid abëd capuceneboed Acobo cuëmëdquid  
 chështen cuesunemepanëdash. Acobon  
 utsimbo Esuquidistun ëbi chuibeneta caid  
 abëd capuceneboed utsi Uan nepanëdash.  
<sup>3</sup> Adoac, Acobo cuesuniosh, qesho tantiaash  
 isadaidbo utsibo, Esuquidistu tantiesabo: —  
 Bëdamboen Edodesën naosh —quepanëdash  
 aido. Adec onqesho tantiaash Edodes:  
 Isadaidbon pan bïdisquesa tantiaid ushë  
 choec, quequin Esuquidistun ëbi chuibeneta  
 caid utsi, Petedo cuëmëdquid, bedmeshun  
 quënën nauedmepanëdash. <sup>4</sup> Aden quënën  
 nauedmeshun Petedo cuenushe qeshun  
 sondado 4ted quënë nuntan tabadmeshun  
 pan nami uambocquid petequid tantiaid  
 ushëtedi naimëdambi ambi naid icsa Petedo  
 chuimenuequin Edodesën caimpanëdash.  
 Adnubien quënë nuntanshun Petedobëdta  
 mëtaniaid sondado daëd uenubi utsi daëdshun  
 shëcuë ëctabëdquin Petedo isec tabadpanëdash.  
 Aid isquidotedi badiadnuc puduedshun isanec  
 ushë abuctotsan nidnubi utsibotsen 4tedbidi  
 choshon isanec ushë cuembocnoc nidoanubi  
 utsibotsen 4tedbidi choshon isanec ushë budtsan  
 nidnubi utsibotsen 4tedbidi choshon isanec  
 inchështsëcnubi badiadnuc isboedo choapanëdash.  
 Adecbidi isboed utsibo inchëshëmbi padpiden  
 isec choapanëdash. <sup>5</sup> Adnubien Esuquidistu  
 tantiaquido iccuededash Nuquin Papa Petedo  
 quënën nauedaid chiec yuec onquepanëdash.

6 Adshumbic, Badiadshun Petedo bēmembī, quequin Edodesēn tantianubi aid inchēshēmbī Petedo bucun mētaniacchobi ushnubi 7 Nuquin Icbon chomiaid, ambi uaid mayan bēda, nibēdquiochoedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mētaniaid mēchiquidpanēdash. 8 Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho 9 Nuquin Papan uaid mayan bēda nidsho isacimboecquin abimbo tantienquiocquin Petedon tsibanampanēdash. 10 Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenuenubi shocosh shēcuē abembi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanēdash. 11 Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash. 12 Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn

tita Madia cuëmédquid icpanédash. Ambobi Esuquidistu tantiaquid dadpen iccuededec Nuquin Papa chiec onquepanédash. <sup>13</sup> Adnubien choshon Petedon shècuë tosh-toshcasha tantiash chido yua Doda cuëmédquid isnuec nidtopanédash. <sup>14</sup> Aid shubu shècuë yacno choshon Petedon cuënsho tantiash bédamboshè iquequi shècnenquio yec aubidi titinquec: —Petedo shècuë yacno choash nidec —quequin iccuededquido chuituidpanédash.

<sup>15</sup> Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida ispash neba —quepanédash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bèda ischitashien nec —quepanédash tantiesa.

<sup>16</sup> Adnubi padpiden Petedon tosh-toshcasha shècnequin isash: —¡Tso! Abimbo caic —quecuededpanédash.

<sup>17</sup> Adnubien médante uic-uiccaic Petedo: —Onquenquio yec tabadquin tantiata. Èbi nashunquin Nuquin Icbon naboed chuibanu —quepanédash Petedo abi quënën nauedacnoshon Nuquin Papan puduemiaid chuibanec. Aden chiash: —Èbi puduemiaid Esuquidistun utsi, Acobobèdta Esus tantiaquid utsibo chuitanta —quianec puduenanec utsi yacno Petedo nidpanédash.

<sup>18</sup> Adashic, badiadnubi quënë nuntan Petedobèd icboed sondadotedi: —¿Mitsimbo

nuquibēdta mētaneboed icpec? Nibēdeque. Is — quec dacuēdpanēdash.

Adashic, Petedo nibēdec, quequin sondadon chiac <sup>19</sup> Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

*Edodes unēsaid*

Adashic, Edodes nidaid Udeya caid yacno abi tabadacnoēsh puđuanec shubu dadpen icquid Sesadeya caid yacno choash tabadpanēdash. <sup>20</sup> Sesadeya caid yacno anoentsēcbidi shubu dadpen icquid Tido caid icnubi aid yacnoēsh anoentsēqui shubu dadpen icquid utsi Sidon caid icpanēdash. Tido caid yacnocquidbēd Sidon caid yacnocquido Edodesbēd chushcananquido ichoedi padenquio yanec tabadpanēdash. Adec chushcananenquio yec tabadquin, Sesadeya yacno Edodes choash tabadosh, quesho tantiash Edodesēn yua Bēdasto cuēmēdquidbēd onquenuec cho-chopanēdash. Cho-choshon, Ęm̄bi pete nibēdsho isun Edodesēn menioshi. Nēbi aid chushcainquio iquembi, quiosh, quequin chochoquidon chuituidpanēdash. Aden chiac adomboembidi Bēdaston Edodes chuiopanēdash. <sup>21</sup> Aden adomboembidi Bēdaston chuiasho tantiashun Edodesēn: —Ęm̄bi chiacpadēn chochoata, quiosh Edodes, quequin chuita —cac chochoquido Bēdaston chuiopanēdash. Aden chiac Edodes onquesho tantianuec ambi chiacdedec ushash dashcute nac-nacquiocquid dasiuidash abembi onquenuec tsadten abuc tsadtoash

onquec taëpanëdash. <sup>22</sup> Aid onquesho tantiash: —Nidaidëns hun tishaid onquiaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuëdcuededpanëdash. <sup>23</sup> Aden chuisho tantiash, Mimbi Nuquin Papa caidpenquo nebique. Aidi abia yampid abentsëcquiobi iqueque. Aiduidi tantiata, quequin chuitiadquidëmbi chienquo icsho tantiashun Nuquin Papan chomiaidën ambi uaid mayan bëdan daicsa uac chichan dadpen yanec Edodes badedi unëspanëdash.

<sup>24</sup> Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanëdash.

<sup>25</sup> Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebëdta Saudo meniac buanec Edusaden yacno choshon anocquido Esuquidistu tantiaquido menetanashic auëshquio puduanec Antioquiya yacno nidoapanëdash. Aidobëdi Uan cashumbic Madcos caid nidpanëdash.

## 13

### *Saudobëdtabi Bednabe nidmiaid*

<sup>1</sup> Adashic, Esuquidistu tantiaquid utsi-utsiec Nuquin Papan yuecquo icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanëdash. Nëidic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmëdquid; utsibic, Cadidia yacnoësh choquid, tsusio dapa, Edodesën shubun

icquid icboedi, Manain cuëmédquid; utsibic, Saudo cuëmédquid. <sup>2</sup> Aidtedishun Esuquidistuidi tantianuen buna mëmunsho Nuquin Papan Mayanën: —Saudobëdtan Bednaben aid daëdshun ëmbi chuibocpaden ma napanuna —capanëdash. <sup>3</sup> Adoaquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabebëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

*Chipide yacnoshon Esuquidistu chuibanaid*

<sup>4-5</sup> Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidtedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nacnëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebëdtan chuibampanëdash. <sup>6</sup> Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd icquidon. Satanasën tantiamiaid icquin abimbo chiacbimboec, Nuquin Papan yuecquio icshun



nanun chiaid chuiquidquio nebi, quequin muaquin chuipanēdash Badesusēn. <sup>7</sup> Aidi Pabos yacnocquido tsusion shubun tabadpanēdash. Anocquido tsusio cobednadod caid Sedquio Paudō cuēmēdquid icpanēdash. Aidi tantiaquiono, quec tabadquin, İsedquido chosh, qesho tantiash, Aidon chuibanaid tantianu, qeshun Saudobēdta Bednabe chomeshun tsusion yuedpanēdash. <sup>8</sup> Yuedac Pabadon Esuquidistu chuibampanēdash. Saudo quequin isadaidbon cuēnubi Pabado quequin isadaidpembon cuēmpanēdash. Aden Pabadon Esuquidistu chuibansho tantiec tsusio tsadsho isun Badesusēn tantiamenquiocnuen utsi uain chuiopanēdash. Ambi ompoaid ismianesa Badesus icsho Edimus cuēmpanēdash. <sup>9</sup> Aden utsi uain chuisho tantiashun Nuquin Papan Mayanēn tantiamiac Edimus bēisequi Pabado: <sup>10</sup>—Satanasēn bacuē yec bēdamboen naidbēdta bēdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibanegue. Tantia. <sup>11</sup> Nēbi con Icbon mibi mēyanquin bēshu uaindac. Ushē chēnqesho mimbi yuen isenquio iquendac —quepanēdash Pabado Edimus chiec.

Aden chuibon Edimusēn ēshē cuen-cuempambo yec inchēshbudac bimboec yanash: —¿Tsuntsimbini mēdinshun buampeba? —quequin nibēdacno mishquin uēmbampanēdash. <sup>12</sup> Aden Edimus bēshu uacsho isec: —Nuquin Icbon chiaid abimbo iquec —quiash tsusio Sedquio Paudō cuēmēdquid Esuquidistu tantiaquid yampanēdash.

*Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid*

<sup>13</sup> Adashic, Chipide yacnoësh puđuanec nidaid Pampidia caid yacno Pabadobëd icquido canon potepanëdash. Aden potiash nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid <sup>14</sup> isbidanec nidaid Pisidia caid yacno shubu dadpen icquid Antioquiya yacno chopanëdash. <sup>15</sup> Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquoio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

<sup>16</sup> Adoaquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. <sup>17</sup> Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquoio bëyucanquin tsusedpabon tishmiaidën tishmiaid caidaido

Equipito yacnoshon buanubi <sup>18</sup> tsusedpabon Nuquin Papan chiaid chieshëmpampic. Adoaquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. <sup>19</sup> Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. <sup>20</sup> Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. <sup>21</sup> Aidi isadaidbo chuiquid icnubic, Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic. <sup>22</sup> Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeoapampic. Aidi Nuquin Papan chiacpadomben nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnocquido tantiamenuen chiec.

<sup>23</sup> Aden chiec abi onquec: —Dabidën tishmiaidën tishmiaid caidaid, Nuquin

Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanēdash. <sup>24</sup> Aidēn nadatiambocquin nabanquin ambi nabanaid tauabicnuc Uan padon, acten mentoanquidēn: ‘Mimbi tantiaid icsa ēnshun acten mentome,’ capanēdash. <sup>25</sup> Adec onquetanequic matses acten mentobudquin nainec: ‘¿Mitsipaden ēbi isquin cuēmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ēbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,’ quepanēdash Uan acten mentoanquid —quepanēdash Pabado.

<sup>26</sup> Aden Uan padon chiacpaden chuibanashic: —Abadauanēn tishmiaidēn tishmiaid caidaido nuqui icsho nuquitedi icsaid bedshunash abided cuidadec Esuquidistu unēsapanēdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanēdash. <sup>27</sup> Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobēd aton tsusio dapabo, Icsambocquid neque. Unēs ua, quequin chuipanēdash. Aden chuiquin utsibēd iccuededte ushēn-ushēnquien abi isec onquiaid Nuquin Papan dada uamiampicpadembi aidon napanēdash. <sup>28</sup> Esuquidistu icsaid nibēdquidquio caiqui, Icsambocquid neque. Aid unēs uatiadquidi mibi nec, quepanēdash Isadaidbo Pidato caic. <sup>29</sup> Adoaquien Nuquin Papan dada uamiampicpaden nabanambien

Esuquidistu cuesten dectanquin unës uacsho chicshun, Ēbi unësacsho nēidēn ēbi nauedec, quequin ambi shēcuē uain nacnenaid chucanquio Osen Esus nauedpanēdash. <sup>30</sup> Adoacsho Nuquin Papan Esuquidistu uincuemiāc <sup>31</sup> capusho Cadidia yacnoēsh Edusaden yacno abēd capucueboedon aidi isbempanēdash. Aden isun aidombi Esuquidistu chuibededec. Adembidi aid isboedobēdtambi abimbo chuibanquidquio nebi —quepanēdash Pabado.

<sup>32</sup> Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi <sup>33</sup> Nuquin Papan uincuemiācsho nuqui isondaaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nēbi ěmbi uincuemiaqui ěmbi chiactedi mimbi naimbudoc.

Adosho isun ěbipadquiocnoc chuiquid dapa mibi icmēmbi.’

Aden ěndenquimboshē aton mado tantiaquin Nuquin Papan chiampic. <sup>34</sup> Adecbidi ambi uincuemetequid Esuquidistun nami chodquesa icpanēdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadēmbi mibi icsaisa icsho ěmbi bēdamboen isaid mibi nec, mado,’

quequin Nuquin Papan dada uamepampic.

<sup>35</sup> Ambi dada uamiampid utsi nad iquec:

‘Icsaisa icsho aton nami chodquesa icmenuna,’  
quequin Nuquin Papan chiampic.

<sup>36</sup> “¿Aden dada uamequin Dabid pado chiecta onquepampic? Padenquo. Aidi Nuquin Papa bunacpadomboen naimbudquin nabanash Dabid unēsacsho isun aton mēdimbon nami chodquiacno Dabid chococac aidēn namitsen chodquepampic. <sup>37</sup> Nuquin Papan uincuemetequidēn namien chodquesa icpanēdash. <sup>38</sup> Aidi icsainquiocquid yec ēbitedi icsaid bedshunash abided cuidadpanēdash. <sup>39</sup> Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi matsesēn natiapimbo iquec. Aden ambi chiacpaden natiapimbo yec, Nuquin Papan bēdamboen isaid nebi, quetiapimbo icboedēmbi, Matses icsaquid icsho cuidnushe quiash abided cuidadec Esus unēsapanēdash, quequin tantiasho, Esuspadquid icsaisa Nuquin Papan nuqui isec. <sup>40</sup> Nuquin Papan chomiaid choec, quequin tsusedpabon tantienquo icampidpadquid iquenda. Aido chuiquin Nuquin Papan dada uamiampid nad iqueque. Tantia.

<sup>41</sup> ‘Ēmbi ěndenquimboshē dada uamiampicpadembi adquid chomembi.

Ēmbi chomiaid isquidon chiac mimbi tantienquo icpec.

Adquid yec, Tantiadempambo iquec, quec mamēnshumēnquid ēbēdi tabadiapimbo iquendac.

Adquid icmane qeshun tantiaquiota’  
—quepanēdash Pabado iccuededquido chiec.

<sup>42</sup> Aden chuibudashic Pabado Nuquin Papan chiaid chuibante shubu yacnoësh aböd choboedoböd puduenanec nidsho isash: — ¿Iccuededte badiad utsi chonoc iccuededquin chuinuecta mibi choape? —quepanëdash iccuededquid utsibo Pabado chiec. <sup>43</sup> Aden chianec Pabadoböd Bednabe nidsho isun isadaidbo utsin-utsinquiembëdtan isadaidpembo isadaidbopadquid icnuequid utsin-utsinquien tsibanampanëdash. Aden abi tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabeböd.

<sup>44</sup> Adashic, chonoadtemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. <sup>45</sup> Dadpen iccuededsho isash isadaidbo tsusiobo: Ëmbi chuiban-sho tantianuec aïdtedi choenquio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

<sup>46</sup> Adoaquien, dacuëdenquio yec Pabadoböd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquembi. Mibi tantiesa yec Nuquin Papaböd tabadte bunesabidi icnuc isadaidpembo Esuquidistu chuibanendambi. <sup>47</sup> Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembali  
ma nidaïdtedi yacno ëbi tantiaquido ëbi yacno  
puduedquid ma icpanuna,”

quequin chioshi —quepanēdash Pabado abi chieshēnquido isadaidbo Nuquin Papan dada uamiampicpaden chiec.

<sup>48</sup> Adsho tantiash isadaidpembo: —iPadtec! Nuquin Papan chiaid bēdamboshē iquec —quecuededpanēdash. Adoquien, Nuquin Papan ēbēdi mibi tabadmendambi, quequin chiaid ambi tantiamiactedi Esuquidistu tantiaquid yampanēdash.

<sup>49</sup> Adec Esuquidistu tantiaquid yanash auēshquio dadpen nidequi nidaid dēuequid utsi-utsiec yacno choash tabadquin aidontsen Esuquidistu chuibanoapanēdash. <sup>50</sup> Adosho tantiash, Pabado icsambocquid nec, quequin isadaidbo tsusiobon Antioquiya yacnocquidon chidobobēdta anocquido chuiquid dapa nēishmeshun Pabadobēdta Bednabe mēyantankuin ashunquio nidmepanēdash. <sup>51</sup> Aden nidta cac puduanec nidtuidash, Esuquidistu ėmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanēdash. <sup>52</sup> Pabadobēd Bednabe Antioquiya yacnoēsh nidan Antioquiya yacnocquid Esuquidistu tantiaquido: —Bēdambo iquebi —quecuededpanēdash. Adembidi aitedi aton Mayan Nuquin Papan menepanēdash.

## 14

### *Iconio yacno*

<sup>1</sup> Adashic, Pabadobēd icquido Iconio yacno choash tabadpanēdash. Ambo tabadec Nuquin



Papan chiaid chuibante shubu yacno nidash puduedpanēdash. Ambo puduedshun Esuquidistu chuibanac isadaidbobēd isadaidpembo dadpen Esuquidistu tantiaquid yampanēdash. <sup>2</sup> Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nēishmepanēdash. <sup>3</sup> Aido nēishmiambi Iconio yacno yuec tabadquin Pabadon Bednabebēdtan dacuēdenquiocquin Esuquidistu chuibampanēdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobēdta Bednabe icmepanēdash. <sup>4</sup> Aden icmiac aid daēdshun nadatiambocquin nasho isash, Isadaidbo tsusiobon chuibocpadec Pabadobēd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanēdash. <sup>5</sup> Aden chuishumbic, Pabadobēdta Bednabe cuestanquin cuēnoten se-senuequin Esus tantiesabo isadaidpembon aton tsusio dapabobēdtan cainubi adembidi isadaidbon aton tsusio dapabobēdtan cainoapanēdash. <sup>6-7</sup> Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabadobēd Bednabe choash shubu dadpen icquid Disteda caid yacno choash tabadquin Pabadobēdtan Bednaben Esuquidistu chuibampanēdash. Adtanec auēshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanēdash. Adtanec auēshquio puduanec nidshun dēuequiec shubu dadpen icquid utsi-

utsiec yacnocquidotsen chuibampanëdash.

*Disteda yacno*

<sup>8</sup>Disteda yacno tabadnubien anocquid taicsaidi anin tishaid caputiapimbo icpanëdash. <sup>9</sup>Aidi Pabadon Esuquidistu chuibansho tantiec, Esuquidistun ëbi bëdamepatsiash, quec otacquoio tsadpanëdash. Aden caputiapimbocquidën tantiacpadomboen Nuquin Papan Pabadotsen tantiamiac <sup>10</sup> caputiapimbocquid comapenen bëisquin: —Nidto —Pabadon cac badedi nidtoash taicsaid bëdanash capupanëdash.

<sup>11</sup> Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. <sup>12</sup> Adtanequi Bednabe otacquoio tsadquid icsho isash ambi tantiaid abentsëc Upited icnuc Upited cain Bednabe cuënquimbi Pabado chuiquidquio icsho isun ambi tantiaid utsi Medcudio icnuc Medcudio cain Pabado cuëmpañdash Disteda yacnocquidon. <sup>13</sup> Aden cuënsho tantiashun baca bënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiachimboecnuc nacnenaid Upited caid dayun uaquido baca cuesunenu, quepanëdash.

<sup>14</sup> Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantanquio nidash Pabadobëd Bednabe comapenec nadpanëdash: <sup>15</sup> —Ëbi daëdi mibipadquid matsesquio nebi. Mimbi tantiacmaid nebique. Baca cuesunenda. Chiaid bëda mibitedi naden

chuinuac chobi. Nuquin Papa caid abentsēcquiobi iquec. Aidēm̄bi abubēdta nidaid uashumbic aidēnquiocquidtedi uabanampidquio neque. Aiduidtsēqui tantiaquin ambi uaidbimboecnuc matsesēn nacnenaaid tantiesa icta. <sup>16</sup> Ēndenquimbo Nuquin Papan, Adoenda, cainquiocnoc matsesēn ambi tantiacpaden nabampampic. <sup>17</sup> Aden, Adoenda, cainquiocquimbi, Abitedishun icbo icquin bēdamboquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabado bēd Bednabe Disteda yacnoquido chiec. <sup>18</sup> Aden chuido-chuidoquai baca cuesunenquio icpanēdash Disteda yacnoquidon.

<sup>19</sup> Adnubien Antioquiya caid yacnoquidobēd Iconio yacnoquido Disteda yacno cho-choshon, Pabado icsambocquid nec, quequin chiac Disteda caid yacnoquido nēishcuededpanēdash. Adec nēishcuededshun Pabado cuēnoten se-siash, Unēsosh, queshun nimbanquin buanshun shubu nibēdacno Pabado netampanēdash. <sup>20</sup> Ambo netanambic, Esuquidistu tantiaquido cho-choshon tscatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabado bēd Bednabe nidoapanēdash.

*Nidaid Sidia caid shubu dadpen icquid Antioquiya yacno choaid*

<sup>21</sup> Adec Dedbe yacno choash tabadquimbi Pabadobëdtan Bednaben chuibanac Esuquidistu tantiaquid dadpen yampanëdash. Auëshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanëdash. <sup>22-24</sup> Aden chuibanshumbic: —Natiavianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nëbi dayacquio yec tabad —capanëdash Pabado. Adotanquin ambia Esus tantiaquid utsi-utsien Pabadobëdtan Bednaben: —Bëdamboec tabadquin ismequin Esuquidistu tantiaquid utsibo chuiban —capanëdash. Adotanec, ambi chuiboedobëd Pabado Bednabe chedo Nuquin Papauidi tantiec buna mëmunquin chiec onquepanëdash. Aden Nuquin Papa chuiquin naimbudquin, Nëmbocquid mibi tantiaquido bëdamboen dayun uata, Papa, quequin chianec Pabadobëd Bednabe chedo Disteda yacnoësh nidoapanëdash. Adecbidi Iconio yacno choashun adomboembidi chuibanoapanëdash. Adecbidi Antioquiya yacno choashun adomboembidi chuibanoapanëdash. Antioquiya yacnoësh puduanec nidec nidaid Pisidia caid datambëtsenec nidaid Pampidia caid yacno choash nidec <sup>25</sup> shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanëdash. <sup>26</sup> Auëshquio cano antabëdtoanec nidec shubu dadpen

icquid Antioquiya caid yacno, Nuquin Papan Mayanën nidta, quequin chiondacnombo choapanëdash. <sup>27</sup> Ambo choash tabadquin anocquido Esuquidistu tantiaquid utsibobëd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobëdtan Bednaben chuibampanëdash. Isadaidpembo dadpen Esuquidistu tantiaquid yamposh, quequin chuipanëdash. <sup>28</sup> Adtanequi yuec Antioquiya yacno Esuquidistu tantiaquid utsibobëdi Pabado Bednabe chedo tabadpanëdash.

## 15

*Edusaden yacnocquido iccuededec tantianu quiaid*

<sup>1</sup> Pabadobëd Bednabe Antioquiya yacno choabicnubien nidaid Udeya caid yacnoësh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dëbid dëtemesa abi yacno Esuquidistun yuedtemaid nendac, quequin chuipanëdash. <sup>2</sup> Adnubic Pabadobëd Bednabe Antioquiya yacno choash tabadquin aidon chiaid tantiash: —Nuquin Papan aden chiambo iqueque. Aden chienda —quepanëdash.

Adsho comapenec cuëdquin chushcapanëdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobëdta Bednabe chuishumbic Esuquidistu tantiaquid utsibo chuoiaquin aido nidmepanëdash. <sup>3</sup> Adoac Antioquiya yacnoësh

pduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanēdash. Adsho tantiash: —Aid tantiec bēdambo iquebi — quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. <sup>4</sup>Auēshquio pduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēdtan Bednaben chuibanoapanēdash. <sup>5</sup> Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dēbid dētemetiadquidi nec. Nuquin Papan naden nata quequin Moises dada uamiampid nabantiadquid neoaic — quepanēdash.

<sup>6</sup> Adoaquien Esuquidistu ambia tantiaquido tsusiobobēd Esuquidistun ēbi chuibeneta caido: Tantiabono, quiash onquecuededpanēdash.

<sup>7</sup> Adec yuec onquecuededash nidtoash Petedo nadeq onquepanēdash: —Chuinu. Tantiata. Ēnden Nuquin Papan naden chuipondashi:

“Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ěm̃bi chuioasho mibitedishun tantiondac.

<sup>8</sup> ěm̃bi isadaidpembo Esuquidistu chiac abi tantiaquid aido yampondash. Matsesēn tantiaid tantiaquid icquin Nuquin Papan, Esuquidistu tantiaquid nec, quequin aton

Mayan nuqui meniacadembi isadaidpembo meneoapondash. <sup>9</sup> Utsibo nec, quenquiocquin aidotsen tantiamequin paucoapondash. <sup>10</sup> Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? <sup>11</sup> Padenquo icnuna. Matsestedi icsaquid icsho cuidnushe quiash abided cuidadac, quequin tantiaquiec unēsash abēdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec — quepanēdash Petedo.

<sup>12</sup> Aden Petedon chuiquin ēnambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanēdash. Adembidi Bednaben chuioapanēdash. <sup>13</sup> Aid daēdshun chuibanquin nainan Esusēn utsi Acobo, Esus tantiaquido tsusio dapa, nadpanēdash: — Ēmbitsen chuinu. Tantiata. <sup>14</sup> Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibēdta aton matses icmiac. <sup>15</sup> Adomboembidi Nuquin Papan chuimiaidēn dada uampid nad iqueque. Tantia. Chuinu:

<sup>16</sup> “Isadaidbobēd yuec tabadenquiocboedi padpidec choash aidobēd icoaindabi. Dabid padon tsyuecquido isadenquiocboedi isad-cuenendac

<sup>17</sup> ma aton Icho matsestedishun istuidpanuna; ma adembidi isadaidpembon ěmbi cuēnaidon aid-bidi istuidpanuna,

18 quec Nuquin Icho ambi ënden tantiampic-padomboen chiaid nec”

—quiashic abi Acobo onquec: 19 —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad. 20 Nëiduidtsëqui dada uaqin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chiduidtsëqui chudta; adembidi, min bënëuidtsëqui chudmeta; adembidi, Nëish tëtaniaid intacchobi codocaid penda, quequin isadaidpembo chuibanuna.

21 Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna — quepanëdash Acobo iccuededquido chiec.

22 Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaid; utsibic, Sidas cuëmëdquid. Aid daëdi Nuquin Papan chiaid comapenen tantiaquidquo icpanëdash. 23 Isadaidpembo chuiquin Edusaden yacnoshon Esuquidistu tantiaquidon naden dada uapanëdash:

“Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobëdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec



onqueta. <sup>24</sup> Ēbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. <sup>25</sup> Aden chuisho tantiashun nēmbocquidobēd iccuededec onquequin abentsēcshun tantiacbimboen dada uaombi. Aidi nēmbocquid daēdi Pabado Bednabebēdta buantan, quequin chiemi. <sup>26</sup> Unēsmane, quenquio yec capucuenequin Esuquidistu chuibanquido Pabadobēd Bednabe nec. <sup>27</sup> Adquid aid daēd icsho isun aid chedobēdta Udas Sidas chedo mibi yacno nidmembi. Adoac ěmbi dada uacpaden ma mibitedi chuioapanuna abimbo iquec camenuen. <sup>28</sup> Nuquin Papan Mayanēn ěbitedi tantiamiacpaden isadaidbon naden nata quequin chiacpaden nata mibi caisa nebi. <sup>29</sup> Nēidtedtsēqui ěbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidoidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ěmbi chiacpaden nabanec mibi bēdambo icpec. Padi aidtedtsēqui chiemi.”

<sup>30</sup> Aden dada uaquin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanēdash. <sup>31</sup> Aden meniac isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

<sup>32</sup> Adnubic Udasën Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamēpanēdash. Adomboembidi chuibanquin Sidasën tantiamēoapanēdash. <sup>33</sup> Aden dadpen ushquin chuibanshun: —Edusaden yacno nidoaibi—caquien:

—Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. <sup>34</sup> Adec aido Edusaden yacno nidnubien <sup>35</sup> Pabadon Bednabe chedobēdtan Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibampanēdash.

*Pabadobēd Bednabe cuēshēdaid*

<sup>36</sup> Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid—quepanēdash.

<sup>37</sup> Adoaquien: —Ma Madcosbidi nidoanu. Chuita—quepanēdash Bednabe.

<sup>38</sup> Adoaquien: —Chieshec aidi cuēshēdondashe. Padi. Nuqui daēdtsēqui nidnu. Nid—quepanēdash Pabado.

<sup>39</sup> Adoaquien Bednabe aden tantienquio yec Pabadobēd comapenec onquiash Madcosbēd cano antabēdtoanec Chipide yacno nidoapanēdash.

<sup>40</sup> Adnubien Pabado Sidas abēd Edusaden yacnoēsh choboed caic: —Nuquibi nidnuna —quepanēdash.

Adec aid daēd nidnuesho isash anocquid Esuquidistu tantiaquido: —Ma Nuquin Papan

mibi daëd bēdamboen nidmequin ma mibi bēdamboen namepanuna —cac Pabadobēd Sidas nidpanēdash. <sup>41</sup> Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibampanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinquiec iccuededacnomboec puduedcuenequin Pabadon chuibanoapanēdash.

## 16

### *Pabadobēd Timoteyo nidaid*

<sup>1</sup> Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. <sup>2</sup> Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuiopanēdash. <sup>3</sup> Aden dadpenshun chuisho tantiaquid Timoteyo buante bumpanēdash Pabado. Adec, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dēbid dētemepanēdash.

<sup>4</sup> Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabadon chuiopanēdash.

<sup>5</sup> Adembidi Nuquin Papan chiaid chiac ėnden Esuquidistu tantiaquidon tantiabenquiocnobi utsi dadpen Esus tantiaquid yanoapanēdash.

*Ushquin Masedonia yacnocquid Pabadon isaid*

<sup>6</sup> Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec <sup>7</sup> nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash.

<sup>8</sup> Adoac nidaid Misia datambidanec shubu dadpen icquid Todoas caid yacno ėbi tabadacnobi chopondash. <sup>9</sup> Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ėbitedi Esuquidistu chuibanec cho —quec onquesho Pabadon tantiapondash. <sup>10</sup> Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ėbitsen Pabadobēd nidpondabi.

*Didia cuēmēdquid Esuquidistu tantiaquid yanaid*

<sup>11</sup> Adanec Todoas yacnoësh puduanec cano antabêdtoanec cuebi nidequi acte nēnantanquio nidaid nacnēdquid Samotodasia caid yacno choash Pabadobêd icquido tabadtuidpondash. Badiadash auëshquio puduanec cano antabêdtoanec nidquimbi potebidanec nidaid Masedonia caid yacno ëbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec <sup>12</sup> nidequi shubu dadpenquio icquid Pidipos caid yacno domanobo dadpenquioshē tabadacno yuec ushec tabadpondash.

<sup>13</sup> Pidipos yacno tabadashic isadaidbo iccuededte badiadēn Nuquin Papa chiec utsibo onquedeniacno istuidnuec puduanec shubu nibêdacno nidequi acte utsi cuēmambi choapondash. Ambo choshon iccuededquido chidobo istuidshun Esuquidistu Pabadon chuibampondash. <sup>14</sup> Pabadon chuibanacno chido Didia cuēmēdquid shubu dadpen icquid Tiatida caid yacnoësh choquid icpondash. Aidēn piucquid bednuen dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. <sup>15</sup> Aidbêd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobêd icquido tabadpondash.

*Pabadobēdta Sidas quēnēn nauedaid*

<sup>16</sup> Adashic padpidec Nuquin Papa chiec onquedeniacno Pabadobēd icquido nidoasho chido yuaidēn bēqueduidpondash. Aidēn mayan icsan tantiamiacpaden yuecash nad iquendac, quequin chuisho piucquid dadpen aid chido matsesēn meniac aid chidon ambi bedaidtedi abi yuaquid meneoapanēdash. <sup>17</sup> Pabadobēd icquido bēqueduidshun tsibambēec choec aid chido: —Nēid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nēid dadatedi nec —quec <sup>18</sup> badiadquidēn-badiadquidēnquiec comapenec cuēdpondash.

Adec cuēdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: — Esuquidistun nadatiambocquin naidēnquio dapuduenta —cac badedquio mayan icsa dapuduempondash. <sup>19</sup> Aden dapuduemiac chido bēdanacsho isun abi yuaquidon: —Nēbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantiash nēishun Pabadobēdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bēshun utsibon sambanaid anoentsēqui abi chuiquido icsho isun chido yuaquidon Pabadobēdta Sidas ambo buampondash. <sup>20-21</sup> Aden abi chuiquid tsadacno bēash: —Nēid dada daēd isadaidbo nec. Nēmbo choshon abi chuiquidon naden nata

quequin chiaid chuibanec. Ĕbitedi domanobo icquin ambi chiaid ěbitedishun natemaic icnuc matsestedi chushquecuededosh —quepondash chido yuaquido abi chuiquido chiec. <sup>22</sup> Aden chuisho tantiaquidon chiac dadpen cho-choash iccuededquin Pabado bĕquidon chiacpadomboen aidontsen chuioac abi chuiquido: —Bĕboedon dashcute chicshun cueshcaten cuesta —cac sondadon cuespondash. <sup>23</sup> Aden comapenen cuesmeshun buameshun quĕnĕn nauedmeshun ambi quĕnĕn nauedaid ista caid chuiquin Pidipos yacnocquido chuiquidon: —Puduenanec cuenushe qeshun nĕid daĕdi bĕdamboen isquiota —capondash. <sup>24</sup> Adsho tantiashun ambi ista caidĕn Pabadobĕdta Sidas nĕnantanquio quĕnĕn nauedquin tsadunshun cueste shĕcuĕ uaidĕn tausunash puduantanquin quĕnĕ bĕdamboen bĕtashpanĕdash.

<sup>25</sup> Aden bĕtashash aton shubu dayun-quiocquidĕn puduedambic inchĕshpotsembo Pabadobĕd Sidas Nuquin Papa chiec onquepanĕdash. Adecbidi Nuquin Papan naid chiec cuĕdĕmpanĕdash. Adeccuĕdĕnsho utsibon tantianubi <sup>26</sup> comapenec nidaid ishcudnubi mĕtaniaidtedi mĕchiquidpanĕdash. <sup>27</sup> Adnubien ista caid isec tsadboedi ushtanec isucunquin isac shĕcuĕ bĕtashaid ĕnden shĕcniac. Adsho isash ista caid: —Quĕnĕn nauedaido puduen-puduempacnui —quetanec: —Chuiquid dapabon ĕbi cuesunemetsiash —qeshun siadnuequin chĕshte abi tsiusudaid chicsho <sup>28</sup> istanquin Pabadon: —Quĕnĕn nauedaidtedi nĕmbo iquebique. Seshuniadenda —quequin

comapenen cuëmpañédash.

<sup>29</sup> Adoaquien, seshuniadtsemboedën: — Tabote bec cho —cac ambi namiaidën tabote bedtanquin meniac tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpañédash. Mibi daëdi bëdamboquid icnubi adquidpenquio nebi, quequin tantiaquin ismepañédash. <sup>30</sup> Adsho isun Pabadon nidtomiaqui seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icho yacno puduednush mitsipadequibi ëbi icsaid cuidadpeque? Chui. Tantianu —quepañédash seshuniadtsemboed.

<sup>31</sup> Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unësash Esuquidistu aton Papa yacno puduedash abi tantiaquido yuedquid neque. Mibi icsaid ënash, Esuquidistu con Icho nec, quequin abimbo tantiatat <sup>32</sup> —queshumbic seshuniadtsemboedbëd icquido Esus tantiamenuen Nuquin Icbon chiaid Pabadon chuipañédash.

<sup>33</sup> Adoaqui Pabadobëdta Sidas cuesaid chiuë acten bëpanshunquin nainacsho aton shubun icquido Esuquidistu tantiaquido yansho isun aitedi Pabadobëdta Sidasën acten mentobampañédash. <sup>34</sup> Aden mentobanaqui aton shubun yuedshun pemepañédash. Adashic, Nuquin Papan chiaid abimbo tantiaquid yec ambi bëdambo icmiaido seshuniadtsemboedbëd icquido icpañédash.

<sup>35</sup> Adashic, badiadash Pidipos yacnocquido



chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuiopanëdash. <sup>36</sup> Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomiaidën chioshibique. Dacuëdenquo yec nid —capanëdash Pabadobëdta Sidas chuiquin.

<sup>37</sup> Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquo caimbi. Ëbi daëdi puduemenuec ma chuiquid dapabo abibi chopanuna —quepanëdash.

<sup>38</sup> Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuisho tantiash chuiquid dapabo comapenec dacuëdcuededpanëdash. <sup>39</sup> Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —queshun puduemetanec: —Pidipos yacnoësh nidtan —capanëdash Pabadobëdta Sidas chuiquin. <sup>40</sup> Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabadon chuibanpanëdash. Aido chuibidanec Pabadobëd icquido nidoapanëdash.

*Tesadonica caid yacnoquido isadaidbo  
nëishcuededaid*

<sup>1</sup> Pidipos yacnoësh puduanec nidequi Pabadobëd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiash Tesadonica caid yacno Pabadobëd icquido tabadpanëdash.

<sup>2-3</sup> Ambo tabadec isadaidbo iccuededte badiadën abi nidteniacpavec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ënden chiampid chuibampanëdash. Nuqui icsaid bedshunash abided cuidavec Esuquidistu unësaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanëdash Pabadon. Sabado 3ted matamequin adomboen chuibampanëdash.

<sup>4</sup> Aden chuibanaqui Esus tantiaquid utsi-utiec yampanëdash. Nëidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanëdash.

<sup>5</sup> Aden Pabadon chuibanac Esus tantiaquid dadpen yansho isash isadaidbo utsibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac natia chushquecuededpanëdash. Adec chushquec nidequi Pabadobëdta Sidas

bednuec Ason cuëmëdquidën shubuno puduedec nidpanëdash. <sup>6</sup> Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenquin chuitemaïd chuibanquido nëmbo <sup>7</sup> choacsho Asonën aid daëd yuedaccosh. Nuqui ancaquid Sesadën chiaïd niacquin ancanquid utsi Esus cuëmëdquid iquec, quequin chuibanec — quepanëdash Pabado chieshënquido abi chuiquido chiec.

<sup>8</sup> Aden, Ancanquid utsi iquec, quequin Pabadobëdtan Sidasën chiec, qesho tantiash chuiquid dapabo iccuededquidobëd comapenec chushquecuededpanëdash. <sup>9</sup> Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuiquin. Adoaquien piucquid meniac bedshun: —Min shubuno nidtan —cac nidanepanëdash Asombëd icquido.

### *Bedeya yacnotsen tabadaïd*

<sup>10</sup> Adshumbic bednushe qeshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caïd yacno nidmepanëdash. Aden nidmiac Bedeya yacno choash tabadec

Nuquin Papan chiaid chuibante shubu yacno Pabado nidpanēdash. <sup>11</sup> Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ĕnden dada uamiampid Pabadon chuibanoasho tantiashun bēdambocquid icquin, Abimbobida chuibanoshe. Isbono, quequin Nuquin Papan chiampid isbanisbanpanēdash Bedeya yacnocquidon. <sup>12</sup> Aden isbanec, Abimbo caic, quiash Esuquidistu tantiaquid dadpen isadaidbobēd isadaidpembo Esuquidistu tantiaquido yampanēdash. Adecbidi isadaidpembo chuiquid dapabo quidieco matses utsi-utsiec aton chido chedobēd Esuquidistu tantiaquid yampanēdash.

<sup>13</sup> Adnubien, Bedeya yacnoshontsen Pabadon chuibanec, qesho tantiash Tesadonica caid yacnocquido, isadaidbo, Asombēd icquido bedmeboedo, Bedeya yacno choshon anocquidotsen nēishmiac comapenec chushquecuededpanēdash. <sup>14</sup> Adsho tantiashun Esuquidistu tantiaquidon Bedeya yacnocquidon acte dapa cuēmano Pabado nidmepanēdash. Adnubi Sidasbēd Timoteyo nidenquio yec Bedeya yacno tabadnubien <sup>15</sup> Bedeya caid yacnoshon utsibon bēyucanquin Pabado buampanēdash. Aden buanec nidequi shubu dadpen icquid Atenas caid yacno chopanēdash. Ambo choash abia bēyucanquido: —Ĕbi chobocnobidi Bedeya yacno nidoaibi —qesho tantiashun Pabadon:

—Mibi yacno choash, Badedquio Atenas yacno chota, quiosh Pabado, quequin Sidasbēdta Timoteyo chuita —capanēdash. Aden Pabadon chi-

aquien Bedeya yacnocquido abi yacno nidoapanēdash.

*Atenas yacnotsen Pabado tabadaid*

<sup>16</sup> Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, queshun cainec capuquimbi Atenas yacnocquidon nacnenaid isbampanēdash. Aidon Nuquin Papan uaidbimboecnuc nacnenaid dadpen tabēcaid papa cain cuēnaid ambi tantiaido icsho isash, Nuquin Papa Abentsēcquiobi iquec, quequin tantiesa Atenas yacnocquido nec, quequin tantiec Pabado unēsquo yampanēdash. <sup>17</sup> Adec unēsquo yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanēdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanēdash. Isadaidbobëd onquequin Esuquidistu Pabadon chuipanēdash. Adembidi isadaidpembobëd onquequin Esuquidistu chuioapanēdash. <sup>18</sup> Anoshon chuibansho tantiash epicudeyo cuëmëdquidën chuinëdacpaden tantiaquido Pabadobëd onquepanēdash. Adembidi tantiash estoico cuëmëdquidën chuinëdacpaden tantiaquido Pabadobëd onquepanēdash. Aido Pabadobëd onquequin Pabadon Esus chuisho tantienquo yec: —¿Atodain comapenec onquequin nëid dadan chuipash? —quepanēdash. Adnubien utsi: —Matses utsibon papa cain cuēnaid chuibanec nepanui —quepanēdash. Pabadon

Esuquidistu unēsash uincuenaid chuisho tantiash adpanēdash. <sup>19-20</sup> Adec onqueshumbic, Utsin tantiaid tantianu, quec Adeyopaco caid yacno iccuedednuequidon bēyucanquin bēash Pabado: —Mimbi chiaid ěmbi tantiacmaid nec. ¿Midapadquidquo mimbi chuibanegue? Tantiyanu. Chuiban —quepanēdash abi bēquido caic. <sup>21</sup> Abi bēquido Adeyopaco caid yacno nidash Atenas yacnocquido dadpen utsi-utsiec yacnoēsh chochoquido badiadquidēn-badiadquidēnquiec utsin-utsinquien ambi tantiacpaden chuibansho tantianuec iccuededpanēdash.

<sup>22</sup> Aden mimbi tantiacpaden chuibanta caquien nēnantanquo nidtoshon naden Pabadon chuibampanēdash: —Chuibanu. Tantiata. Mimbi papa cain cuēnaid mimbi tantiaid iquec, quequin tantiembi. <sup>23</sup> Capucuenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabēcaid icnubi mimbi cuēnacmaid abentsēc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsēqui iccosh. Mimbi cuēnacmaid mimbi tantiacmaid mibi chuibanu. Tantiata.

<sup>24</sup> “Ěmbi Nuquin Papa cain cuēnaid nidaidbēdtabi abu uashumbic aidēnquiocquidtedi uaquidquo nec. Abitedi uaquidquo yec abitedishun icbombo aidi nec. Aidi tabadmenuequin matsesēn shubu uashunaidēn tabadesa nec. <sup>25</sup> Aidi abitedishun Icho icnuc abitedi aton na nec. Adquid icsho, Con na mibi menenu, matsesēn aid catiapimbo iquec. Aidēn tantiacpadec ěbitedi nēmbobi tabadebi. Aidēn tantiacpadec ěbitedi tiboquebi.

Aidën tantiacpaden ëbitedishun bedbanoaimbi.  
<sup>26</sup> Aidëmbi bëyuc dada uampidën tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inchështanec badiadoaic. Adecbidi, ushë nidash choaic. <sup>27</sup> Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nëpec? queshun ëbi tantiaquin Icbo ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. <sup>28</sup> Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantia. Chuinu: Nuquin Papan bacuëbo ëbitedi nebi, quequin min mëdimbon chuipanëdash.

<sup>29</sup> “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquiocquid matses nec. <sup>30</sup> Ènden matsesën ambi nacnenaid aden cuënsho tantiaquid Nuquin Papa, Chën. Adoenda, quenquiocboedi nëbi, Mimbi icsamboen tantiaid ënta, quequin chiec. <sup>31</sup> Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiäidën cuidbanendac. Ambi abipadquid matses icmiäid, Nuquin Papan matsesën naid chuibanquid icmenu caid unësacsho isun ambi chiampicpaden nanuequin Nuquin Papan uincuemepondash —

quepanëdash Pabado Adeyopaco yacno iccuededquido Esus tantiamenuec.

<sup>32</sup> Adec aidi unësacsho Nuquin Papan uincuemepondash, quequin Pabadon chuisho tantiash utsi-utsiec mamëns shumë nubi utsi-utsiec: —Aidën chui boed padpiden tantianuna — quepanëdash. <sup>33</sup> Adoaquien, Pabado Adeyopaco caid yacnoësh nidpanëdash. <sup>34</sup> Adec nidshun yuec ushquin chuisho tantianu quec Pabadobëd iccuededquin utsin-utsinquien padpiden-padpidemboen tantiabededpanëdash. Aden Pabadon chuibanac utsi-utsiec Esuquidistu tantiaquid yampanëdash: Nëidic, Dionisio cuëmëdquid Adeyopaco caid yacno iccuededquido chuiquid nepanëdash. Utsibic, chido Damadis cuëmëdquid adecbidi Esuquidistu tantiaquid yampanëdash. Aidobëd utsi-utsiec Esus tantiaquid yampanëdash.

## 18

### *Codinto yacno Pabado tabadaid*

<sup>1</sup> Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash.

<sup>2</sup> Ambo isadaidbo Aquida cuëmëdquid nidaid Ponto caid yacnoshon tishaid Pabadon istuidpanëdash. Isadaidbotedi nidaid Itadia yacnoësh nitan, ancanquidën cac aton chido Pidisida cuëmëdquidbëd Codinto yacno choash Aquida icpanëdash. <sup>3</sup> Nidaidën capuquid yua bitsi shubumpi nacnenquid abipadquid Aquidabëd aton chido icsho isun aidobëd tabadquin Pabadon shubumpi nacnempanëdash. <sup>4</sup> Codinto yacno



tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibanpanēdash.

<sup>5</sup> Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin isadaidbo Esuquidistu tantiamenuen Pabadon chuibanpanēdash.

<sup>6</sup> Adsho, Aid tantiatiapi, quequin isadaidbon Esuquidistu icsamboen chuisho tantiash abi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiesa yec unēsash Nuquin Papa yacno puduedenquo mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquo iquembi. Isadaidpembon tantiatsiash, quequin aido chuibanembi — quepanēdash Pabado isadaidbo tantiesa chiec.

<sup>7</sup> Aden chiashic Nuquin Papan chiaid chuibante shubu yacnoēsh puduenanec aid dayuntsēqui shubu icquidēn Pabado puduedpanēdash. Aid shubu icho Usto cuēmēdquid Nuquin Papa tantiaquid icpanēdash. <sup>8</sup> Uston shubunoshon Esuquidistu Pabadon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentōbampānēdash.

<sup>9-10</sup> Adashic, yuecash inchēshēn Pabado usho

Nuquin Papa: —Codinto yacnocquid dadpen Esuquidistu tantiaquid yanendac. Aden ëmbi chiac dacuëdenquiocquin comapenen chuideneta. Mibi dayun uaquidquio nebi. Aden dayun uasho ëbi tantiesabon mibi natiametiapimbo iquendac — quepanëdash Pabado caic. <sup>11</sup> Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabadon chuidonepanëdash.

<sup>12</sup> Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. <sup>13</sup> Ambo bëquin puduedmiash: —Ancanquidën chiaid niacquin matsesën tantiatemalaid nëid dadan chiosh — quepanëdash Pabado chieshënquido Cadion caic.

<sup>14</sup> Adoaquien Pabado onquetsenubi Cadiomba onquedopanëdash: —Tantiata, isadaidbo. Mibi chuinu. Nëidën icsamboen nabanaid mibitedishun ëbi chuisho tantiatsiambi. <sup>15</sup> Aden chienquio yec, Nëidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaïd chuiquidquio nëid dada nec, mibi queoapec. Aden mimbi chuisho tantiashun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. <sup>16</sup> Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaïdon puduemepanëdash.

17 Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquo yec otacquo tsadpanëdash.

18 Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabadon matasmepanëdash. 19 Ambo ushë abentsëc nidmec tabadash cano antabëdtoanec acte dapa potias Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiasun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabadon. 20 Aden chuibansho tantiasun: —Adomboembidi chuibanuec ¿ada ëbëd yuec tabadtsia? —iccuededquidon caquien: —Nëbi padenquo iquebi. 21 Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquo puduanec nidequi cano antabëdtpanëdash Pabado.

22 Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun

isanec nidequi shubu dadpen icquid Antioquiya yacno Pabado choapanēdash. <sup>23</sup> Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auēshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bēdamboen tantiamenuen chuibanoapanēdash Pabadon.

<sup>24</sup> Adnubien isadaidbo Apodos cuēmēdquid shubu dadpen icquid Adecandedia caid yacnoēsh Epeso yacno chopanēdash. Aidi dadpen tantiaquid yec Nuquin Papan chiampid tantiaquid nepanēdash.

<sup>25</sup> Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanēdash.

<sup>26</sup> Aidi Nuquin Papan chiaid chuibante shubu yacno nidshun dacuēdenquiocquin ambi tantiaid chuibampanēdash. Aden chuisho tantiash, Ēbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbēdtabi abi unēsash uincuenaid chuibampanēdash Aquidabēdtan aton chidon Apodos tantiamequin.

<sup>27</sup> Aden Esuquidistu bēdamboen tantiash Epeso yacno yuec tabadquin Esuquidistu Apodosēn chuibampanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiashun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēdquid Esuquidistu tantiaquid nec. Ēmbi

isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, queshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bēdamboen tantiamenuen chuibampanēdash. <sup>28</sup> Aden chuibanquimbic isadaidbo Esuquidistu tantiesabo icsho isun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibampanēdash.

## 19

### *Epeso yacno Pabado abēd icquido tabadaid*

<sup>1</sup> Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa dectatocuētsenec shubu dadpen icquid Epeso caid yacno choapanēdash. Ambo choshon Esuquidistu tantiaquido istuidshun: <sup>2</sup> —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabado.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

<sup>3</sup> Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiec.

4 Adoaquien: —Mibi icsaid ënta, queshun abimbo tantiaquidtedi acten mentobanquin, Èbi tsibanec choquid Esus tantiaquid icta, quequin Uan padon chuipanëdash —quepanëdash Pabado Epeso yacnocquido chiec. 5 Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanëdash. 6-7 Aden aitedi acten mentoacsho mëdanten Pabadon mamishbanac aid doseted Nuquin Papan aton Mayan menepanëdash. Aden meniac abi onquiacmaidënquio onquec Nuquin Papa chiec cuëdëmpanëdash Epeso yacnocquido.

8 Adashic Nuquin Papan chiaid chuibante shubun puduedshun Pabadon Nuquin Papabëd tabadaid chuibampanëdash. Cuembo tantiamenuequin ushë choaid 3ted nidmequin badiadquidën-badiadquidënquien dacuëdenquiocquin Nuquin Papan chiaid Pabadon chuibampanëdash. 9 Aden chuisho tantiash pamumëdacbimboec tabadquin, Tantiatiapibi, quequin utsin-utsinquien chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash. 10 Seta daëd matamequin adomboembi chuibampanëdash Pabadon. Aden chuibansho tantiash nidaneshun chiac nidaid Asia caid yacnocquidon tantiapanëdash. Adoac

isadaidbobëd isadaidpembo Esus tantiaquido yampanëdash. <sup>11</sup> Epeso yacno Pabado tabadsho Nuquin Papan nadatiambocquid icmiacsho <sup>12</sup> Pabadon dada cuëscashun dashcute cuëshë buanshun daicsaid mishbanac bëdampanëdash. Adembidi Pabadon dada cuëscabanaidën nënquid mishac bëdampanëdash. Adembidi pashuidtsen pamishac bëdanoapanëdash. Adembidi mishac mayan icsa dapuduempanëdash.

<sup>13</sup> Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedënquio dapuduen —capanëdash. <sup>14</sup> Pabado tanuequido isadaidbo chuiquid Esqueba cuëmëdquidën mado 7ted icpanëdash. <sup>15</sup> Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tantianu. Chui <sup>16</sup> —qeshun nebudquin dashcute ched-chedcapamboen mayan icsan cuesactaniaqui shubu nuntanuësh puduenanec cuempanëdash Esqueban mado. <sup>17</sup> Adec cuensho isquidon chiac Epeso yacnocquid isadaidbobëd isadaidpembo dacuëdcuededpanëdash. Adec dacuëdquin, Dacuëdampambo iquec. Esuquidistu bëdambocquid nec, quequin tantiabededpanëdash. <sup>18</sup> Esuquidistu tantiesa icboedi Esuquidistu tantiaquid yanec dacuëdenquio yec Esuquidistu tantiaquido iccuededacno nidshun abi icsaid chuibampanëdash. <sup>19</sup> Adquid dadpenshun icsamenuen ambi ompoquin naid ismen- quiochoedombi, Nëbi adquid ictiapibi, quequin cuëte dëtsiadotanquin ambi ompoquin tantiamiaid

dada uatetedi tantianuen bedash utsitsen icsabudnushe queshun abitedi tauipanēdash. Aden tauiboed menequin piucquid dadpen bedtsiandac, quepanēdash. <sup>20</sup> Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

<sup>21</sup> Adashien Pabado: —Edusaden yacno nid-nuequin nidaid Masedonia caid yacnocquido is-bidanquin nidaid Acaya caid yacnocquidotsen is-bidanec nidec Edusaden yacno choash tabadashic shubu dadpen icquid Doma caid yacnotsen nid-tiadquio iquebi —quepanēdash Pabado. <sup>22</sup> Aden chiasht Asia caid yacno abi tabadquin Masedonia caid yacno abia Timoteyobēdta Edasto nid-mepanēdash Pabadon.

<sup>23</sup> Aid daēdi nidan Epeso yacno tabadquin Esuquidistu Pabadon chuibanaquien tantiesabo nēishpanēdash. <sup>24</sup> Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemaiid menequin piucquid dadpen bedbampanēdash. <sup>25</sup> Aden Esuquidistu tantianu quesa icquin ambi Dianabimboecnuc nacnenta caidobēdta abipadquid Diana nacnemequid utsibo iccuededmeshun Demetedion nadopanēdash: —Nuqui tantiaid Dianabimboecnuc nacnenshun menequin piucquid dadpen nuqui bedbanec. <sup>26</sup> Aden nanubi nidaid utsi yacnoēsh Pabado cuēmēdquid nēmbō choshon utsi comapenen chuibanac Epeso yacnocquid dadpembēdta nidaid Asia caid yacnocquid dadpenshun tantiec. Dianabimboecnuc nacnenaid tiboquesa iquec. Adquid matsesēn tantiaid abimbo ictiapimbo



iquec, quequin Pabadon chiec. <sup>27</sup> Aden chiac matses dadpeshun tantiash Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaidbëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesën tantienquio ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaboedombi padenquio yampec. Aidëmbi tantienquio yanshun aidbimboecnuc nuqui nacnenaid bedenquio iquendac —quepanëdash Demetedio.

<sup>28</sup> Aden chiac ambi chomeboedtedi, Piucquid ëbi menequin ëmbi nacnenaid matsesën padpiden bedenquio ictsiash, quec nëishash: —Epeso yacnocquidon tantiaid Diana bëdambo iquec — quec comapenec cuëdcuededpanëdash. <sup>29</sup> Adec comapenec cuëdcuededsho tantiash Epeso yacnocquid utsibo aidobëd cuëdcuededpanëdash. Adec cuëdcuededquin nidaid Masedonia caid yacnoësh Pabadobëd choboed Cayobëdta Adistadico bedshun iccuededte shubu yacno cuëdcuededquidon buampanëdash. <sup>30</sup> Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanëdash Esuquidistu tantiaquidon. <sup>31</sup> Adembidi, anocquido chuiquid utsin-utsinquien Pabado chuiopanëdash.

<sup>32</sup> Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin

tantienquo yec tabadpanēdash. <sup>33</sup> Adnubien, Nuqui tantiacpadomboen chuitan, quequin isadaidbon Adecandedo cuēmēdquid nēnantanquo tsicunepanēdash. Aden tsicunequien nidtoash: —Tantia. Chuinu —quequin <sup>34</sup> daēdpactsēc chiec onquesho tantiash onqueboedi ēnēdash tabadnubi: —Isadaidbo aid nec —quesho tantiash: —Epeso yacnocquidon Diana cain ambi tantiaidbimboecnuc nacnenaid bēdambo iquec —quec baded-badedquiec cuēdcuededpanēdash.

<sup>35</sup> Adec cuēdcuededshobien Epeso yacnocquidon naden nata quequin chiaid dada uaquidēn ēnēdmenuequin nadopanēdash: —Epeso yacnocquidon tantiata. Chuinu. Diana caidbimboecquid abucuēsh paēdaidbimboecnuc nacnenaid nuqui comapenen tantiaidbēdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. <sup>36</sup> Aden utsibon tantiec, quequin tantiaquin icsamboen nainda.

<sup>37</sup> Dada daēd mimbi nēmbo bēboed Diana caidēn shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. <sup>38</sup> Adenquo icnuc Demetediobēd icquido abi chushquiaid chuinuec Epeso yacnocquidon naden nata quequin chiaid tantiaquid yacno nidshun <sup>39</sup> mimbi tantiacpaden chuita cuēdcuededenquiocquin. <sup>40</sup> Comapenec cuēdcuededec quesho tantiash ancanquid dapan Epeso yacnocquido bēdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquo iqueque. Cuēdcuededquido chome, nuqui catsiash.

Aden chomiac ¿atotsi nuqui chuipe? <sup>41</sup> Aidën nuqui chomenushe quiash min shubuno nidaneta —capanëdash Epeso yacnocquidon naden nata quequin chiaid dada uaquidën. Aden chiac Demetediobëd iccuededquido nidanepanëdash.

## 20

*Masedonia yacnocquido isbidanec nidequi  
Quedesia yacnocquido isbidanec nidaid*

<sup>1</sup> Natia cuëdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. <sup>2</sup> Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. <sup>3</sup> Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiashun: —Ambo nidacsho mibi cuesunenuequin isadaidbon cainec —cac nidaid Masedonia caid yacno Pabado nidoapondash. <sup>4</sup> Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic

Tedopimo cuëmédquid. Aidededi icpondash.  
<sup>5</sup> Aidededi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. <sup>6</sup> Aidededi nidan pan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

*Eyutico unësacsho uincuemiaid*

<sup>7</sup> Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiaash yuec onquepondash inchëshpotsambo yantsëcquieci. <sup>8</sup> Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. <sup>9</sup> Pabado onquenubi nëbi caniaid, Eyutico cuëmédquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash bud-budshun unësacsho isbedednubien <sup>10</sup> Pabadotsen budquin dayumbudec: —Unësboedi abi tiboquianeque. Shubicuededenda —quepondash. <sup>11</sup> Aden chiaash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquieci. Adec badiadbudbon Pabadobëd icquido shubu nuntanuësh puduem-

puuenuvien <sup>12</sup> paëdboed aton shubuno utsibobëd nidpondash bëdambo yec.

*Todoas yacnoësh puuanec Mideto yacno chote*

<sup>13</sup> Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puuanec nidequi cano antabëdtoanec Ason yacno nidoapondabi.

<sup>14</sup> Adec nidequi Ason yacno choshon istuidac Pabado ëbëdi cano antabëdtoanquin potiaash shubu dadpen icquid Mitidene caid yacno choapondash.

<sup>15</sup> Auëshquio puuanec nidec badiadash acte nënantan nidaid nacnëdquid Quio caid datambidanec nidash badiadash acte nënantan nidaid nacnëdquid utsi Samos caid datambidanec shubu dadpen icquid Mideto caid yacno choapondash.

<sup>16</sup> Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

*Epeso yacnocquido tsusiobo Pabadon chuibanaid*

<sup>17</sup> Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash.

<sup>18</sup> Aden chomeshun naden aido chuipondash: —Chiembique. Tantiata. Ëbi ënden nidaid Asia caid

yacno choash mibëd yuec tabadquin nabanaid mibitedishun istenepondac. <sup>19</sup> Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. <sup>20</sup> Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinquiec puduedcuenequin chuibanondambi. <sup>21</sup> Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

<sup>22</sup> “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. <sup>23</sup> Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. <sup>24</sup> Aden Nuquin Papan Mayanën chuisho tantiashi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

<sup>25</sup> “Nëshunquio Nuquin Papan chiaid ëmbi chuibansho mibitedishun tantiabenonaidon

nëuëshquio ëbi nidacsho mimbi isoainquio iquendac. <sup>26</sup> Ëmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac. <sup>27</sup> Tantienuioctsiash, quenquiocquin Nuquin Papan tantiacpaden chuibanombi. <sup>28</sup> Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unëspanëdash. <sup>29</sup> Ëbi nidan abimbo chiacbimboen chuiquid Esuquidistu tantiaquido chuiquid icnuec choendac. <sup>30</sup> Adembidi mibëdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. <sup>31</sup> Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ënenquiocquin chuibanondambi. Adquid choec, quequin mibitedi chiec shubiondabi.

<sup>32</sup> “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. <sup>33</sup> Mibëd tabadec, Min piucquid bec cho, quesa niondabi. Adecbidi, Min dashcute bec cho,

quesa niondabi. <sup>34</sup> Ĕmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ěbĕd capuquido menebanondambi. <sup>35</sup> Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icho Esuquidistu nidaidĕn tabadec nadpanĕdash: ‘Utsin natiapimbocsho menequid Nuquin Papan bĕdambo iquebi camiaid nendac. Nabanenquio yec bedshumĕnquidquio icsho Nuquin Papan bĕdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

<sup>36</sup> Aden chiashic Pabado Nuquin Papa chuinuec utsibobĕd danĕshĕn sebudcuededash onquecuededpondash. <sup>37</sup> Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. <sup>38</sup> Ĕbi padpiden mimbi isoainquio iquendac, Pabado quesho tantiaish shubicuededpondash. Adec shubiquin dayumbudash unĕsquio yec Epeso yacnocquido tsusiobo Pabadobĕd cano yacno nidanepondash.

## 21

### *Edusaden yacno Pabado nidoaid*

<sup>1</sup> Epeso yacnocquido tsusiobo acte cuĕman tabadnubi cano antabĕdtoanec Pabadobĕd capuquido nidquimbi cuebi potiaish acte nĕnantan nidaid nacnĕdquid Cos caid yacno choapondash. Badiadnuc auĕshquio puduanec nidec acte nĕnantan nidaid nacnĕdquid utsi



Dodas caid yacnotsen choashic puduanec nidequi shubu dadpen icquid Patada caid yacno choapondash. <sup>2</sup> Ambo choashic nidaid Penisia caid yacno cano dapa utsin nidnuequid istuidash antabëdtoanec Pabadobëd capuquido nidoapondash. <sup>3</sup> Adec nidquimbi acte nënantan nidaid nacnëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. <sup>4</sup> Aden buanbuanubi Esuquidistu tantiaquido yacno nidanec puduedash 7tedec ushec Pabadobëd capuquido tabadpondash. Ambo tabadnubi, Edusaden yacno Pabado cunesunenuequiv iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. <sup>5</sup> Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash. <sup>6</sup> Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano choboedo aton shubuno nidaneapondash.

<sup>7</sup> Adec cano antabëdtoanec auëshquio nidec shubu dadpen icquid Todemaida yacno choash Pabadobëd capuquido tabadtuidpondash. <sup>8</sup> Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu

tantiaquidon chido niante meneta caid utsi 6tedibëd Uedipe icpondash. <sup>9</sup> Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

<sup>10</sup> Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash. <sup>11</sup> Adec choshon Pabadon tsiute bedash tataniadash mëtaniadash Accabo nadpondash: — Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembro menendac — quepondash Accabo Pabado chiec.

<sup>12</sup> Aden Accabon chuisho tantiash shubiquin Pabadobëd choboedon Uedipen shubun icquidobëdtan, Edusaden yacno nidenda, quequin Pabado chuioapondash. <sup>13</sup> Adoaquien: —¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna — quepondash Pabado. <sup>14</sup> Adoaquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, quesho tantiashun: —Ma Nuquin Icbo bunacpadec nidpanuna —capondash.

<sup>15</sup> Aden chiashic Sesadeya yacnoësh puduanec Edusaden yacno Pabadobëd capuquido nidoapondash. <sup>16</sup> Adec nidsho isash Sesadeya yacnocquid Esuquidistu tantiaquid utsi-utsiec

Pabadoböd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

*Pabadon Acobo isaid*

<sup>17</sup> Adec Edusaden yacno choacsho Esuquidistu tantiaquidon Pabadoböd capuquidtedi Pabadobëdtabi yuedpondash. <sup>18</sup> Aden yuedac tabadash badiadash Acobo isec nidoapondash. Acoboböd Esuquidistu tantiaquido tsusiobotedi icpondash. <sup>19</sup> Adec nidec ambo puduedshun, Mibi isec chobi, quequin, Embi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

<sup>20</sup> Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. <sup>21</sup> Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantiashe, Nuquin Papan, Naden nata, quequin chiaid niacmequid Pabado nec, quequin ic-samboen tantiec aido tabadec. <sup>22</sup> Aden chiec tabadquin mibi nëmbo choaid tantiashe mibi cuesunete buntsiashe. Mibi cuesunete bumenuquo icmenuequin ¿Atotsi nuqui napeba? <sup>23</sup> Naden nac bëdambo ictiashe. Tantia. Chuinu, Pabado. Nëmbo ëbëd icquido Nuquin Papauidi tantiec tabadnuequid daëd-daëdquieci iquec. <sup>24</sup> Nuquin

Papan ëbi bēdamboen dayun uadenesho ismenu, quiash nidaid Quedesia yacnoësh, Èbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuequiv piucquid menembi,” quepondac. Nēbimbobi Edu-saden yacno mibi choaoc. Nēid dadatedibēd Nuquin Papa tabadte shubu uashunaid yacno nidshun mimbi ēnden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquio Pabado nec, quequin tantiatsiash. <sup>25</sup> Èmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nēidtedictsēqui mimbī natequid nendac. Nēidic, Nuquin Papan uaidbimboecnuc nacenaid tantiaquidon pete sanaid penda; adembidi, min chidouidtsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isadaidpembo chiombi—quepondash Acobo Pabado chiec.

<sup>26</sup> Aden chiaquien badiadash Nuquin Papa tabadte shubu uashunaid yacno dada 4tedbēd choash Pabado, Nēidted dadabēdtambi ëmbi Nuquin Papan chiacted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

*Pabado bedaid*

<sup>27</sup> Adashic 7tedec ushquin naimbudnubi Pabado Nuquin Papa tabadte shubu uashunaid

yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec: <sup>28</sup> —Isadaidbotedishun tantiata. Nēidēmbi Nuquin Papa tabadte shubu uashunaidēn puduedtemaid isadaidpembo yuedquin nēid shubu bēda icsa uameboed neque. Bednu. Uidēn uaic cho —quequin abimbo chiacbimboec onquecuededpondash. <sup>29</sup> Epeso yacnoësh choquid isadaidpembo Tēdopimo Pabadobēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

<sup>30</sup> Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shēcūē bētashpondash. <sup>31</sup> Aden Pabado buanec, Cuesunenu, quec cuēdcuededsho tantiashun chuitanac <sup>32</sup> abi chuiquidbēd sondado cho-chosho isun Pabado cuesbededquin isadaidbon ēmpondash.

<sup>33</sup> Adec choshon sondado chuiquidēn bedtan cac Pabado bedshun shocosh bucun mētanemepondash. Aden mētanemiash: — ¿Tsutsi nēid nepec? ¿Atotsi icsamboen naosh? —quepondash sondado chuiquid.

<sup>34</sup> Adoaquien iccuededquid utsi-utsitsēcquien chiec onquecuedednubi utsi-utsitsēcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quēnēn nauedmenu. Buanec nid —quepondash sondado chuiquid sondado chiec. <sup>35</sup> Aden Pabado buanec nidec nauedte shubun dectatonobi

cuëdcuededquidon tsucuscuededtsëcquien Pabado bednuesho isun Pabado abuc cadoanquin sondadon buampondash. <sup>36</sup> Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

*Ambi nabanaid iccuededquido Pabadon chiaid*

<sup>37</sup> Adec abi buanec shubun puduedtsenubi Pabado: —¿Ada ëbi onquesho tantiatsia? — quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten on-quequidta mibi ne? <sup>38</sup> Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi. <sup>39</sup> Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

<sup>40</sup> Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquoio tabad, quequin ismequin Pabadon mëdante uic-uiccapondash. Aden nasho isash isadaidbo otacquoio tantiec tabadsho isash: — Ebedeyon, nuquin onqueten mibi chuinu —quec nadec Pabado onquedopondash:

## 22

<sup>1</sup> —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

<sup>2</sup> Adec aton onqueten Pabado onquesho tantiash isadaidbo otacquo tantiec tabadpondash.

<sup>3</sup> Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nēmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. <sup>4</sup> Aden nabanquin Esuquidistu tantiaquido Nuquin Papan chiaid niacquido nec, quequin dadabêdta aton chido chedo bedmeshun mëyamequin quënën nauedmeshun unës uamepondambi. <sup>5</sup> Ëmbi adobanquin naonaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bēmenu, quesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

<sup>6</sup> “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacbimboec chënquequin dëcatepondashi. <sup>7</sup> Adec chënquequin dëcatiac nidaidën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tiantanu,’ capondashi.

<sup>8</sup> “Adoaquimbi: ‘¿Con Icbomboda mibi ne?’

capondac.

“Adoaquien: ‘Nasaded yacno iccondaaid mimbi mëyanaid Esus nebi,’ capondashi.

<sup>9</sup> “Adnubic ëbëd icquidon shocosh bed-bedquiacbimboec chënquesho isequi con Icbon chuisho tantienquoio yec tabadpondash.

<sup>10</sup> “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. <sup>11</sup> Adoaquini nidtoquin shocosh bed-bedquiacbimboec chënquequidën bëshuacsho isun ëbëd icquidon mëdinanquin Damasco yacno buampondashi.

<sup>12</sup> “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquoio icscho isadaidbo utsibon bëdamboen isaidquoio icpondash. <sup>13</sup> Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

<sup>14</sup> “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantien-dac. <sup>15</sup> Aden aid isquin tantiaishun utsi-utsien dadpen mimbi isaidbëdta mimbi tantiaid mimbi chuibenendac,’ quequin <sup>16</sup> chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi pau-



cacbimboen utsibo ismenuen acten mentometa,' capondashi Ananiasën.

<sup>17</sup> “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushac bimboec tsadpondabi. <sup>18</sup> Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquicquid yec nëmbocquido mibi cuesunete buntsiashe. Edusaden yacnoësh badedquido nidan, quequin Nuquin Icho chuipondashi.

<sup>19</sup> “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. <sup>20</sup> Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dash-cute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

<sup>21</sup> “Adoaquini Nuquin Icho: ‘Isadaidpembo yacno mibi nidmembique. Nidan,’ capondash —quepondash Pabado ambi nabanaid iccuededquido chiec.

### *Pabado cuestasenaid*

<sup>22</sup> Pabaton ambi nabanaid chuibansho tantiec iccuededquido otacquio tabadboed, Isadaidpembo, quec Pabado onquesho tantiash: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

<sup>23</sup> Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadoon chuiboed tantiatemaid nec, quequin ismequin.

<sup>24</sup> Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmboconoc cuesta, quequin sondado chuiquidën chuipondash. <sup>25</sup> Adoaquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidënshun tishaid icsho ëmbi naid chuimiabida ëbi cuese? —quepondash Pabado sondado chuiquid chiec.

<sup>26</sup> Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bëboed: “Domanobon nidaidënshun tishaid nebi,” quiosh —quepondash sondado chuiquid comandante chiec.

<sup>27</sup> Adoaquien Pabado yacno nidshun comandanten: —¿Domanobon nidaidënshun tishaidta mibi nepe? —capondash Pabado chuiquin.

Adoaquien: —Ai, domanobon nidaidënshun tishaidquio nebi —quepondash Pabado.

<sup>28</sup> Adoaquien: —Domanobon nidaidënshun tishaidpenquio ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

<sup>29</sup> Aden Pabado chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

*Isadaidbo tsusiobo iccuededacno Pabado buanaid*

<sup>30</sup> Adshumbic, badiadshun ambi mëtanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

## 23

<sup>1</sup> Aden nidtomiaquien isadaidbo tsusiouidi comapenen isec: —Ütsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniobi —quepondash Pabado.

<sup>2</sup> Aden chuisho tantiashun: —Muaquin chieque. Ëccues —Isadaidbo tsusio dapan Ananiasën cac Pabado dayunquio icquidën Pabado ëccuespondash.

<sup>3</sup> Aden ëccuesaquien Pabado: —Mibi icsaid nibëdacbimboec mibibi tsadsho Nuquin Papan mibi ëccuesmendac. Nuquin Papan naden nata quequin chiaid tantiembi, quequimbi ëbi ëccuesmequin Nuquin Papan chiaid ma mimbi

niacpaboc —quepondash Pabado isadaidbo tsusio dapa caic.

<sup>4</sup> Aden Pabadon chuisho tantiash aton dayun-quiocquidquo: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

<sup>5</sup> Adoaquien: —Ëmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquo icsho ëmbi chuibocpaden chienquo ictsenombi. Mimbi abimbo chioc. Ëmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

<sup>6</sup> Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ëbibi padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic.

<sup>7</sup> Aden Pabadon chiaquien saduseyobo, Uinciente nibëndedac, quequin ëmbi tantiacpaden Pabadon tantienquo iquec, quec comapenec onquecuedednubi padiseyobo, Uinciente iquendac, quequin ëmbi tantiacpaden Pabadon tantiec, quec comapenec onquecuededpondash.

<sup>8</sup> Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoaic saduseyobo. Padiseyoboen, Uincuentequid iquec,

quec. Adecbidi Nuquin Papan uaid mayan bēda, ambi uaid utsi mayambidi iquec, queoaic.

<sup>9</sup> Aden ambi tantiacpaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi padiseyobo, Nēid dada bēdambocquid nec. ¿Mayanēn chioshi, queshodambi muc nec capadi? Adecbidi, ¿Nuquin Papan uaid mayan bēdan chioshi, queshodambi muc nec caoapadi? Padenquo iquemi. Pabado chuiboed abimbo iquec, quepondash padiseyobo saduseyobo caic. <sup>10</sup> Adec comapenec onquec natiambo chushcanansho tantiaashun comandanten: —Podon shoyonquin canite dēchicnushe queshun mēnchicshun shubu nuntan bēoata —cac sondadon Pabado mēnchicpondash.

<sup>11</sup> Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ushnuubi Nuquin Icho chopondash: —Mimbi Edusaden yacnoshon ēbi chuibanacpaden shubu dadpen icquid Doma caid yacnoshontsen mibi chuibamembique. Dacuēdenquo yec dayacquio icta —capondash Nuquin Icho Pabado chuiquin.

*Pabado cunesunenu quequin ompoquin cainaid*

<sup>12-13</sup> Adec Pabado bēd Nuquin Icho onquebombien badiadash isadaidbo 40ted Pabado cunesuniabi icquin buna mēmuniemi, quequin abimbo chiemi, quepondash. <sup>14</sup> Aden nanu quiaash isadaidbo tsusiobo yacno nidash: —Pabado cunesuniabi icquin buna mēmuniemi, quequin muenquiocquin chuibanombi.

<sup>15</sup> Ēbitedishun ompoquin Pabado cuesunenuequin cainubien mimbi comandante chuitanta caid naden chuimeta: Pabadon naid bēdamboen tantianuna. ¿Ada padpiden isadaidbo tsusiobo iccuededte shubuno bēmeoatsia? quequin chuitan Pabado bēmeoatsiashe. Aden Pabado sondadon bēsho Pabado cuesunenuna —quepondash Pabado cuesunenuequido isadaidbo tsusiobo caic.

<sup>16</sup> Aden aidon chuishobien Pabadon piaquēn tantiashun Pabado yacno nidshun chuiopondash aton piaquēn.

<sup>17</sup> Adoquien Pabadon sondado 100ted chuiquid cho, cata cac nidshun aton piaquēn chiac Pabado yacno sondado chuiquid chopondash. Adec chosho isun: —Nēid con piac nec. Aidi comandante chuite buneque. Aid yacno buanta— Pabadon cac <sup>18</sup> buampondash.

Aden Pabadon piac comandante yacno buanash sondado 100ted chuiquid: —Quēnēn nauedboed Pabado cuēmēdquidēn ēbi chomeshun: “Con piac comandante chuite buneque. Aid yacno buanta,” cac bēombi —quepondash sondado 100ted chuiquid comandante chiec.

<sup>19</sup> Aden chiaquien Pabadon piac mēdinanquin udictsēc buanash comandante: —¿Atotsi ēbi chuinuec cho? —quepondash comandante.

<sup>20</sup> Adoquien Pabadon piac: —Badiadshun isadaidbon ambi namiaid mibi yacno chomec. Aden chomiac nēmbo choshon naden chiec: “¿Ada isadaidbo tsusiobo iccuededte shubuno Pabado mimbi bēoapatsia? Aidēn naid chuibansho bēdamboen tantianuna,” quiosh cata, quequin chomioshi, quequin mibi chiendac isadaidbo

tsusiobon chomiaid. <sup>21</sup> Isadaidbon muaquin chiendac. Con cu Pabado buamenuen mibi aden chiendac. Comandanten Pabado bēmetsiash, quequin tantiaquin Pabado con cu cuesunenuequin caineque. Nidmenda. Con cu cuesunenuequid: “Pabado cuesuniabi icquin buna mēmunembi,” quiosh. Con cu cuesunenuen nēbimbobi podqued cuēmanshun ompodshon cainec —quepondash Pabadon piac comandante chiec.

<sup>22</sup> Adoaquien comandanten: —Isadaidbon chiaid mimbi chuiboed utsi chienquoio yec nidec nid —capondash Pabadon piac chuiquin.

<sup>23</sup> Aden Pabadon piac nidmeshun sondado 100ted icquido chuiquid daëd chomiash comandante nadpondash: —Ēnden inchēshan Sesadeya yacno ma mibēdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuioata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuioata.

<sup>24</sup> Adembidi Pabadobēd icquido cobednadod Pediques yacno buanun cabayo nacnenta —capondash comandanten sondado 100ted chuiquid daëd chuiquin.

<sup>25</sup> Aden chuishumbic naden comandanten dada uapondash Pediques cobednadod caid chuiquin:

<sup>26</sup> “Quēdaudio Disias nebi. Chuiquid dapa cobednadod caid, Pediques, mibi bēdambocquid icsho chuinu. Pabado ěmbi bedboed mibi yacno buamenuen dada uaimbique. Ēmbi

dada uaid isec onqueta. <sup>27</sup> Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpembëd choquin mënchiccombi. <sup>28</sup> Aden mënchicshumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. <sup>29</sup> Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho tantiashun quënën nauedenquioctiadquidi nauedmepondash, quequin tantiashumbi quënën nauedmeoapombi. <sup>30</sup> Aden Pabado quënën nauedmeoashumbic, Podqued cuëmanshun Pabado cuesunenuequin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuequido mibi yacno nidmembali. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobëdta nëid cobednadod Pediques menenuen buanta — capondash comandanten.

<sup>31</sup> Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. <sup>32</sup> Ambo choash badiadshun sondado cabayo catsadquidonuidquio Pabado buanec nidnubi sondado utsitedi auchidi nidaneopondash. <sup>33</sup> Adec Pabado buanec nidequi Sesadeya yacno choshon abi chuiquid



comandanten Quëdaudio Disiasën dada uaidbëdta Pabado Pediques menepondash cabayo catsadquidon. <sup>34</sup> Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoaquien Pabado: —Nidaid Sidisia caid yacnoшон tishaid nebi —quepondash.

<sup>35</sup> Adoaquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

## 24

### *Pediquesën tantianubi Pabadon ambi naid chiaid*

<sup>1</sup> Adashic, 5tedec ushash isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. <sup>2</sup> Aido chosho isun Pediquesën Pabado chomiacsho isun isadaidbo tsusiobon tantiacpaden chuinuequidën Tedtudon naden Pediques chuipondash: —Mibi chuinu. Tantia. Chuiquid bëdambocquid icquin mimbi bëdamboen nabanac isadaidbo bëdamboec tabadec. <sup>3</sup> Mimbi aden nabansho isun, Bëdambocquid mibi nec, quequin

mibi chiembi. <sup>4</sup> Aden chuishun mibi chieshmenquiocnuequin isadaidbon chushcaboed bad-edquio chuinu. Tantiata.

<sup>5</sup> “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaïd tantiaquido tsusio nec. Aidëmbi nidaïdtedi yacno nidshun ambi tantiaïd chuibanquin isadaïdbo comapenen chushcamequin cuëdcuededmiac cuëshëd-cuëshëdposh. <sup>6</sup> Aidëmbi Nuquin Papa tabadte shubu uashunaidën puduedtemaïd matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. <sup>7</sup> Aden cuidnu quenubien comandante Disias cuëmëdquid choshon Pabado mënichicanquin buamposh. <sup>8</sup> Pabadon ambi naid chuisho mimbibi tantiashun, Isadaïdbo tsusiobon abimbo chiosh. Icsambocquid nec, quequin mimbi chuiopatsiac —quepondash isadaïdbo tsusiobon tantiacpaden chuinuequid Pabado icsambocquid nec, Pediques camenuëc.

<sup>9</sup> Aden Tedtudon chuiquin nainan isadaïdbotedi, Ai, Tedtudon chiacpadec iccosh, quequin chuibededpondash.

<sup>10</sup> Adsho tantiashun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantiata. Ëmbitsen chuinu. Dadpen seta matamequin con matses isadaïdbo abi chushquiaïd tantiashun mimbi bëdamboen tantiacpaden namedenioc. Adquid mibi nec, quequin tantiaquin, Ëmbi naid chuibanec bëdambo iquebi, quec dacuëdenquio yec onquebique. Tantiata. <sup>11</sup> Edusaden

yacno choash ambobi 12tedec ushobi. Ĕbi anoshon isboedon, Abimbo iquec, quequin nĕmbo choshon mibi chuitsiash. Edusaden yacno choash Nuquin Papa shubu uashunaidĕn puduedec Nuquin Papa tantianuec choapobi.

<sup>12</sup> Ambo puduedash utsibĕd chushcananenquo yec tabadsho istuidash, Icsambocquid nec, queposh. Adembidi chuibanquin utsibo

nĕishmequin chushcamenquo iccombi. Pabado icsambocquid nec, quequido Pabadon chiaid abimbo iquec, quetiadquidi nec. <sup>13</sup> Ĕmbi

naid Tedtudon chuibamboed, Abimbo iquec, quetiapimbo iquec tsusiobo. <sup>14</sup> Nĕiduidtsĕqui

abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquo nebi. <sup>15</sup> Adembidi,

matses unĕsacsho Nuquin Papan uincuemiab abi tantiaquid abĕdi tabadnubi abi tantiesa chian anĕdĕnquequid nĕsecaindac, quequin tantiembi isadaidbo tsusiobon tantiacpadembi. <sup>16</sup> Aden

tantiaquin Nuquin Papan, Bĕdamboen mimbi naoc, capashuni, quequin bĕdamboen nabanec tabadec nebi. Adembidi, matsestedishun, Bĕdamboen mimbi naoc, capashuni, quequin adomboembidi bĕdamboen nabanec tabadec nebi.

<sup>17</sup> “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bĕdamboen dayun uabenioshi, quequin

piucquid menenuc choapobi. <sup>18</sup> Aden menenuc abi tabadte shubu uashunaidën puduedash ëbentsëqui capusho ëbi chushcaboedon istuidposhi. Bëdamboec tabadsho istuidposhi.

<sup>19</sup> Ëbi capusho istuidquido isadaidbo nidaid Asia caid yacnoësh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nëshuntsen adomboembidi chuitiadquidi nec. <sup>20</sup> Adembidi isadaidbo

tsusiobon: ‘Padiseyobo yec bëdambocquid nec,’ quequin ëbi anoshon chiacpadembidi nëshuntsen adomboembidi chuioatiadquidi nechitec.

<sup>21</sup> Anoshon nëiduidtsëqui chiec comapenec cuëdobi: ‘Unësash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ëbi mibi chiec caimbi — quepondash Pabado Pediques chiec.

<sup>22</sup> Aden Pabadon chuisho tantiash Pediques tantiauidquid iquec: —Nëbi mimbi aidtedquio chuibansho tantiembi. Comandante Disias nëmbo choan mibi padpiden chuimembi — quepondash Pediques Pabado chiec. <sup>23</sup> Aden chuishumbic

naden Pediquesën sondado chuipondash: — Shubuno Pabado buanshun puduednushe qeshun ista. Abi menenucquid abi isnuequid chedo chosho isun yuedta — quepondash Pediques ambi Pabado ista caid chiec.

<sup>24</sup> Adashic, daëdpactsëc ushash Pediquesbëd aton chido, Dusidia cuëmëdquid chopondash. Aton chido isadaidbo icpondash. Adec aton chidobëdi choshon abi yacno Pediquesën bëmiacsho ambi tantiaid Esuquidistu Pabadon chuibanac Pediquesën tantiauidpondash. <sup>25</sup> Aden

chuiبانquin Pediques Pabadon nadopondash: Utsin abi utsiböd chushcananaid chuiبانacsho Nuquin Papan chiacpaden aido nametiad, quequin chuiپونداش. Adembidi, Icsamane quequin Nuquin Papan chiacpadenuidi nabanta, quequin Pediques chuiپونداش Pabadon. Adembidi, Esuquidistu tantienguio icsho chian anödênquequid Nuquin Papan nësecanushe quequin Esuquidistu tantiata, quequin Pabadon chuiپونداش. Aden Pabadon chuisho tantiash: —Padi. Ęmbi naid nibödsho isun padpiden chuimenuen mibi bëmeoaimbique. Nëbi nidec nid —cac Pabado nidپونداش. <sup>26</sup> Adshumbic, adembidi abi yacno Pabado Pediquesën bëmeded-bëmededپونداش. Nidtiadquio icquin piucquid Pabadon ëbi menetsiash, quequin tantiaquin Pabado bëmiash aiböd Pediques onqueپونداش. <sup>27</sup> Adashic, seta daöd matamiash Podzio Pesto cuëmëdquid cobednadod yampونداش. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niamپونداش naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niamپونداش.

## 25

### *Pabadon ambi naid Peston chuimiaid*

<sup>1</sup> Pesto cobednadod yanash Sesadeya yacno choash 3tedec ushanec Edusaden yacno nidپونداش. <sup>2</sup> Adec Pesto Edusaden yacno choash tabadsho isadaidbo tsusiobo, Pabado chushcaquido:

<sup>3</sup> —¿Ĕbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunenuquidon cainshun cuesunepēc, quequin tantiaquin isadaidbo tsusiobon aden Pesto chuipondash.

<sup>4</sup> Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi.

<sup>5</sup> Pabadon icsamboen naosh, quec utsi-utsiec ēbēdi nidshun anoshon Pabadon naid icsa ēbi chuita —quepondash isadaidbo tsusiobo caic.

<sup>6</sup> Adashic, 10tedec ushash Edusaden yacnoēsh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bēmepondash isadaidbo tabadnubi. <sup>7</sup> Aden bēmiacsho isash Pabado dēcatec isadaidbo Edusaden yacnoēsh chobedo Pabadon naid chiec abimbo chiacimboec onquecuededpondash.

<sup>8</sup> Aden isadaidbon chiaquien: —Ĕmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobēd puduedambocobi. Adembidi, empedadod Doma yacno tabadquid, Sesad cuēmēdquidēn chiaid niacamboccombi —quepondash Pabado.

<sup>9</sup> Adoaquien: —¿Edusaden yacno buanac anoshon adomboembidida isadaidbo tsusiobo chuiuoatsia? —quepondash Pesto Pabado chiec. ¿Edusaden yacno Pabado ada bēmeoatsia? quequin isadaidbon chiapaden nanuec Pesto adpondash.

<sup>10</sup> Adoaquien Pabado: —Domanobo ancaquidēn empedadod caidēn, Sesad cuēmēdquidēn, Mibi

yacnocquido bēdamboen tabadmequid icta, caid icquin mimbimbo chushcananquid bēdamboen tabadmeta. Isadaidbo icsamboen tantiaquin nainquioccombi. Abimbo Pabado chiec, quequin mimbi tantiec. <sup>11</sup> Icsambocquidquio iquec Pabado unēs uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ěmbi naid chuite bunebi, quequin dada uaindami —quepondash Pabado Pesto chiec.

<sup>12</sup> Aden Pabado chuisho tantiash Pesto udictsēc nidash abipadquidbēd onquiash choash: —Sesad ěmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

*¿Atotsimbi Pabado napatsia? quequin Peston Aquidipa caid*

<sup>13</sup> Adashic daēdpactsēc ushash ancanquid utsi Aquidipa cuēmēdquidbēd aton chuchu Bedenise cuēmēdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. <sup>14</sup> Adec isedec choash dadpen ushec tabadsho isash Pabado chiec Pesto nadpondash: —Pediquesēn quēnēn nauedmiaid Pabado cuēmēdquid chuinu. Tantiata. Aidi abi iquec shubu nuntan. <sup>15</sup> Aid ambo icnubi Edu-saden yacno nidobi. Ambo ěbi choacsho isun, Pabado icsambocquid neque. Aidi unēs uata, quequin isadaidbo tsusiobon chuiposhi.

16 “Adoaquien, Mibi abëdi chushquiaid Pabadontsen chiamoconoc unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi.

17 Aden chiac nëmbo choshon abi chushquiaid aidon chuisho tantiec tsadnuen Pabado bëmiombi.

18 Aden Pabado bëmiacsho ëmbi tantiacpaden abi chushcaquidon Pabadon naid chienquiocposh.

19 Ëmbi tantiaidpenquo Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon.

20 Aden ambi tantiaidquo bëdamboen tantienquo yec nadpobi Pabado caic. Min matsesën naden nata quequin chiaid tantienquo iquembique. Edusaden yacno buamiac mimbi naid anoshon chiac bëdambo ictsiash, quequin chiombi.

21 Adoaquien: ‘Empedadod, Sesad yacno nidshun ëmbi naid chuitiadquo iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbobi Pabado quënë tabadec —quepondash Pesto Pabado chiec Aquidipa tantiamenuequin.

22 Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

### *Aquidipa ambi naid Pabadon chiaid*

23 Aden Peston chiaquien badiadash bëdaidquo dasiuidash Aquidipabëd aton chuchu choash iccuededte quënë puduedash sondado chuiquido chuiquid utsibobëd aid daëdi



tabadpondash. Aido tabadsho isun Peston Pabado bëmepondash. <sup>24</sup> Bëmiac Pabado nënantanquio nidtonobi Pesto nadpondash: — Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Èbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioaposhi. <sup>25</sup> Aden chuisho tantiashun nëid ambi naid chuimeoapombi. Aden Pabadon chiaidtsen tantiashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna. <sup>26</sup> Aden buamenuen ¿atotsimbi dada uaqin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. <sup>27</sup> Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

## 26

<sup>1</sup> Aden Peston chiaquien: —Mibibi onquequin mimbi naid chui. Tantienu —quepondash Aquidipa Pabado caic.

<sup>2</sup> Adoquien Pabado nadpondash: — Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. <sup>3</sup> Isadaidbon naden nata quequin

chiaidbēdta abi onquiaid mimbi tantiec. Aden tantiaquid mibi icsho ěmbi nabanaid ěmbi chuibansho tantiata. Chuinu.

<sup>4</sup> “Ĕbi tishondacnoĕsh canidosho con matsesĕn isadaidbon istenepondashi. Nĕbi caniquid iquec Edusaden yacno choash tabadsho adembidi aidon istenepondashi. <sup>5</sup> Ĕbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. <sup>6</sup> Unĕsash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uami-aid tantiaquid ěbi icsho isash, Icsambocquid nec, quec isadaidbo. <sup>7</sup> Nuquin tsusedpa Acobo isadaid caidĕn madobon tsyuecquidon, Unĕsacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. <sup>8</sup> Nuquin Papan nadatiambocquin uincuemete chiaid mimbi tantienquo icpe.

<sup>9</sup> “Ĕnden ěmbitsen tantiauidquin shubu dadpen icquid Nasaded yacno ictened, Esus cuĕmĕdquid tantiaquid icsambocquid nec, quequin unĕs uamembi, qeshun adobampondambi. <sup>10</sup> Edusaden yacnoshon adquid dadpen mĕyamepondambi. Isadaidbo tsusiobon, Adota, cac ěmbibi Esus tantiaquid bĕdambocquid icsho bedshun quĕnĕn nauedmepondambi. Unĕs uanu, qesho tantiash, Ai, unĕs uatiadquo iqueque. Adota, quepondabi. <sup>11</sup> Nuquin Papan chiaid chuibante shubu utsi-utsiec yacno nidted-nidtedondabi aido mĕyamenuec. Esus, Nuquin Papan madopenquo nec,

aido camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

<sup>12</sup> “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. <sup>13</sup> Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. <sup>14</sup> Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebedeyon onqueten abucuësh onquesho naden tantiondambi: Saudo, ¿atotsieshun ëbi tantiaquido mimi mëyampe? Èbitsen mëyantiadpambocquin mimi aido mëyanec, quec onquequin chiondashi.

<sup>15</sup> “Adoaquimbi: ‘¿Tsutsi mibi ne, Icho?’ caondac.

“Adoaquien, Mimi mëyanaid Esus nebi. <sup>16</sup> Èmbi namiaid mibi icmenuec chobi. Esus isombi, quequin ¿ëbi chuibeneta caid nëbi mibi yanec? Èbi chuibenequin mimi isaidbëdta ëmbi yuecshun ismetequid chuibeneta. <sup>17</sup> Aden ëbi chuisho mibi cuesunete bunquid isadaidbobëd Isadaidpembo icscho mibi mënchiquendambi. Adquid chuibanta, quequin mibi nidmembi. <sup>18</sup> Aden chuibanac utsin-utsinquien pashuacbimboechedëmbi tantiendac. Icsambocquid nebi, quequin tantienquiocboedi, Icsaobique. Èbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid

ëbi tantiaquid utsibëd iquendac, quequin Esusën chuipondashi.

<sup>19</sup> “Aid abucuësh onquesho tantiashun chieshenquiocquin chuibeniombi caimbi, mibi chuiquin Aquidipa. <sup>20</sup> Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanoaondambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiacpaden nabanta, quequin chiombi. <sup>21</sup> Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. <sup>22</sup> Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac nëid ushënquio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. <sup>23</sup> Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado iccuededquido chiec.

<sup>24</sup> Adec Pabado onquesho tantiash: —Min tantiate icsabudash mibi onquec. Mimbi tantiaid

dadpen iquec tantienquo yec onquechitequien  
mibi nec —quepondash Pesto Pabado caic.

<sup>25</sup> Adoaquien Pabadon: —Bëdamboen tantiec  
onquebi. Ëmbi chiaid abimbo iquec, caimbi  
mibi ancaquid Pesto. <sup>26</sup> Ancanquid Aquidi-  
pan ëmbi chuibamboed abimbo iquec quequin  
tantiec. Aden aidën tantiasho dacuëdenquiocquin  
aid chiemi. Ëmbi chuibamboed ompoenquioc-  
quin isquidon chuisho aidëmbi tantiapondash.  
<sup>27</sup> Nuquin Papan ambi naden nanun chiaid dada  
uamiampidon chiaid chuisho mimbi tantioc —  
capondash Pabadon Aquidipa chuiquin.

<sup>28</sup> Adoaquien Aquidipa: —¿Mimbi chuiboedt-  
edtsëqui tantiashtabi Esuquidistu tantiaquid  
yampe? —quepondash Aquidipa Pabado chiec.

<sup>29</sup> Adoaquien Pabado: —Esuquidistu tantiaquid  
ëbipadquid mibëd iccuededquidtedibi Nuquin Pa-  
pan icmepashun. Nëid ushënquo daëdpactsëc  
chiombi. Aidtedtsëqui chiac tantiatiapimboc-  
sho isun yuen chuibantsiambi ma Esuquidistu  
tantiaquid mibitedi yanueshun. Padnuen ma  
mëtaniaid ëbipadquid ma mibitedi iquenquiocpa-  
nuna —quepondash Pabado.

<sup>30</sup> Aden Pabadon chuibanaquien ancanquid  
Aquidipa nidtopondash. Nidtoho isash Pestobëd  
Bedenise iccuededquid utsibo chedo nidtocued-  
edpondash. <sup>31</sup> Adec nidtocuededash pudue-  
nash onquecuededec: —Chuibamboed icsam-  
boen nainquioccosh. Adoenquiocsho unës uain-  
quioctiad. Adembidi ënden quënën naueden-  
quiocpatecnëdan —quepondash ancanquido.

<sup>32</sup> Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

## 27

### *Doma yacno Pabado buanaid*

<sup>1</sup> Adashic, Nēbi mētaniaido nidaid Itadia caid yacno buanac bēdambo iqueque. Pabadobēdta mētaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuēmēdquid icpondash. Domanobo ancaquid tantiec aid cuēmēdacpadec Aucustobo nebi quec sondado 100tedbēdi abi chuiquid abibi cuēmēdpondash. <sup>2</sup> Aden buanta cac Pabadobēdta utsibo bedshun acte cuēmano buan-shun cano dapa Adadamitio cain cuēnaid istuidpondash. Aid cano dapa istuidashien, Icho, nidaid Asia caid cuēman shubu dadpen icquid utsi-utsiec yacno nidtuidebi, quequin chuisho tantiash Pabadobēd antabēdtopondabi. Adec antabēdtosho isash puduampondash. Pabadobēd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoēsh choquid icpondash.

<sup>3</sup> Adec cano antabēdtoanec nidquin shubu dadpen icquid Sidon caid yacno buampondash. Ambo choash, Mitsana nibēdeque. Mibi yuedquid yacno nid. Aidon mibi menetsiash, quequin Pabado bēdamboen tantiaquin sondado chuiquidēn, Udion, chuipondash. <sup>4</sup> Adshumbic Sidon caid yacnoēsh puduanec nidquin potesho cunquequidēn bēquedtuīdac ushē choacmi

cuenadtanquin acte nēnantan nidaid nacnēdquid Chipide caid datampondash. <sup>5</sup> Adembi nidaid Sidisia caid ēquē datanash nidaid Pampidia caid ēquētsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. <sup>6</sup> Ambo choshombic sondado chuiquidēn cano utsin nidnuequin nibēnquin istuidpondash. Nidaid Equipito caid yacno shubu dadpen icquid Adecandedia caid yacnoēsh choboedi nidaid Itadia caid yacno buanu caid istuidpondash. Aden aid istuidshun Pabadobēd icquido aid canontsen antabēdtomepondash. <sup>7</sup> Adec Mida yacnoēsh puduanash nidquin potec dadpen ushacsho cunquequidēn cano bēqueduidpondash. Aden bēquedac bēdiactsēc nidquimbi shubu dadpen icquid Nido caid ēquēbitsen datambidanec acte nēnantan nidaid nacnēdquid Quideta caid yacno buanoapondash. Uquē cuēma utsiuc Sadmon caid icpondash. <sup>8</sup> Ushē choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsēc shubu dadpen icquid Dasia caid iccondash.

<sup>9</sup> Cunquequidēn bēquedac yuenquio potiactanetsēcquien buampondash. Comapenec cunquequidēn nuqui bēquedendac, quequin tantiaquin Pabadon nadopondash: <sup>10</sup> — Chuinu. Tantiata. Nēuēshquio puduanquin potesho cunquequid dapan bēquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid

chuiquin. <sup>11</sup> Aden Pabadon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. <sup>12</sup> Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

*Acte dapa potesho cunquequid dapanquio cano bëquedte*

<sup>13</sup> Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. <sup>14</sup> Adec nidequi udictsëc yanshobi ushë cho-choaid ëquëctsëcshun Quideta caid nidaid mananucuësh cunquequid dapa choquin bëquedtuiddquin <sup>15</sup> icbon cano nidmetiapimbocnobi cano buampondash. <sup>16</sup> Aden cunquequidën buanaqui acte nënantan nidaid nactëdquid utsimpi Quëdauda caid ëquëbictsëc cuenadquimbi canompi cano dapan nëshun buanaid buanushe qeshun anandopondash. <sup>17</sup> Aden canompi anandoshon cano dapa canchednushe qeshun uidën uaqin datanëbanshumbic cano buante dashcute abi dectante cuestebëdtabi imbudshun dashcute chicacsho cunquequidën cano comapenen buampondash. <sup>18</sup> Aden cano cunquequid dapan buanubi badiadnuc acte natiambo tëccoasquesho isun ambi ansandoshon bëboed acte nësiapondash. <sup>19</sup> Adshumbic 3tedec



ushun bucu dëneshun cano dashcute indotetedi nësiaopondash. <sup>20</sup> Aden nēsecanec nidquimbi inchëshën ushëbëdta uispa abu chëshën bētinacsho isenquio iccondambi. Adembidi badiadën ushë isenquio iccondambi. Dadpen ushquin aitededi isenquioccondambi. Aiteded isenquiocnobi acte comapenen tēccoascapondash. Ad icsho isash, Bēnudchitequien nuqui iquec, abitedimbo quecuededpondash.

<sup>21</sup> Adequi nuqui iquec, queshun buna mēmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienquio yec mibi puduampoc. Ēmbi chiacpaden nabanuc mimbi ansandoaidtedi abi ictsiandac. Adecbidi, Unēsebi, quenquio nuqui ictsiandac. <sup>22</sup> Padnuen acte tēccoasquenubi nuquitedi unēsenquio iqueque. Dacuēdenquio yec dayacquio icta. Canouidi canched-canchedendac. <sup>23</sup> Nuquin Papan namiaidquio nebi. Adquid icsho inchëshën ambi uaidën mayan bēdan ambi chomiaidën naden chioshi: <sup>24</sup> “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquio yec tabad,” caposhi Nuquin Papan uaid mayan bēdan. <sup>25</sup> Aden aidën chiac dayacquio icta. Nuquin Papa ambi chiacpaden nabanquid nec, quequin tantiembi. <sup>26</sup> Adembidi, acte tēccoasquequidën nuqui acte nēnantan nidaid nacrēdquid cuēmano buanshun cano cancheshunendac, quequin

tantiombi —quepondash Pabado canon antabédtoaido chiec.

*Cano canched-canchedaid*

<sup>27</sup> Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tēccoasquequin buanubi inchëshpotsambo yanuc, Cuëma anoentsëquien nuqui choendac, quequin cano nidmequidon tantiapondash.

<sup>28</sup> Aden tantiaquin, ¿Tionda iqueque? Tanu, qeshun yuëmbocquid shocosh bucu dēdectanshun pumbudquin tampondash. Aden tanshun, Aidiompenquio iquec, quequin chuipondash.

<sup>29</sup> Nidaid cuënote dapa cunquequidën buanquin cano semenushe qeshun cano uidën uate dapa yuëmbocquid tsitsumi tsidectanshun acte nēnequin uidën uash ma badiadbono quiash tabadpondash. <sup>30</sup> Adec tabadnubi cano nidmequido cuenueshun dēbiate yacnoshontsen cano uidën uate yuëmbocquid dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenuequin adopondash. <sup>31</sup> Adec

aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. <sup>32</sup> Aden Pabadon chiaquien abi dectante bucutedi sēnac canompi nēpaēdpondash cuenuequido nidtiapimbo yec.

<sup>33</sup> Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piamboccoc. <sup>34</sup> Mibi mentoadenquio iqueque.

Min manëdaid abentsëc paëdenquio iqueque. Penquiochoedi unëschitomane quenquiocquin peta—quepondash Pabado. <sup>35</sup> Aden chuishumbic utsitedi ismequin pan bedshun Nuquin Papa chuishun pan cuëshun Pabadon pepondash. <sup>36</sup> Aden Pabadon pesho isun, Nuquitsen penuna, qeshun abitedishun pebededpondash. <sup>37</sup> Cano antabëdtoquido 276ted icpondash. <sup>38</sup> Aidedshun peshumbic, Cuëmano nidec, quequin ambi sandoaid utsitedi tiedën caniquid ëshë acte nësiapondash, Cano yuëmbo iquec, qeshun.

<sup>39</sup> Adshumbic, badiadnuc ambi isacmaid nidaid istuidpondash. Acte cuidiantanquid cuëmambi masi icsho isun ambo cano nidmenushun <sup>40</sup> uidën uaid tebanac acte nëpaëdpondash. Adembidi, cano dëbidiadmete bucutedi seccudoashun cano dëbiateno buanquin dashcute shoyontanquimbi cadoapondash, Cunquequidën acte daëd naccuëscananacno buampashuni, quequin. <sup>41</sup> Aden cano nidmenubi cano dëbiaten masi setuidec dëchiquidtiapimbo yec cano dapa dëtocquepondash. Adec dëchiadash acte tēcçoasquequidën cano dapa canche-canchequin tauapondash.

<sup>42</sup> Adsho isash sondado, Mëtaniaidtedi cuentsiashe. Cuesunenu, qesho <sup>43</sup> tantiash Pabado cuesunenushe qeshun: —iChën! —capondash sondado chuiquidën. Aden chuishumbic, Acten tantanec mëquiadquido tantanec nidanenubi <sup>44</sup> tantantiapimbocquido cano cuësh-cuëshëdaid bedbanash noadec tanta-nquido tsibanec nidta, quequin chuipondash sondado chuiquidën canon antabëdtoquido

chuiquin. Aden ambi chiacpadquiec nidanec mentoadenquio yec abitedi nidaid yacno choash dectatocuededpondash abitedi.

## 28

### *Madta caid yacno Pabadobëd icquido choaid*

<sup>1</sup> Adec nidaid yacno choash dectatoneshun, Nëid acte nënantan nidaid nacnëdquid Madta caid nec, qesho tantiabededpondash. <sup>2</sup> Ambo tabadquidon abitedi bëdamboen yuedpondash. Iquen uampamboec ue sequenubi Madta caid yacno chosho isun cuëte dëtsiadoshon, Cuëec cho, quequin chuipondash. <sup>3</sup> Adnubic Pabadontsen cuëte tanunquiocquid bedtanquin tsindoquin masandopondash. Aden masandoaid nëdënquiacnoësh puduenquin nisin Pabado mëpepondash. <sup>4</sup> Aden mëpiash ëchchiquidenquio yec mëdiadsho isashien anocquido: —Nisin piaid cuesunianquid nepanui. Mentoadenquio yec actenuësh dectatoacsho nisin piac unëschitequien iquec. Abi icsaid cuidtequidien nechitec.

<sup>5</sup> Adec onquecuedednubien Pabadon comapenen uicac nisi cuëte dëtsiadoaidën nëpaëdpondash. Adnubien Pabado abi bëdambo icpondash. <sup>6</sup> Aden Pabadon uicac nisi paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

<sup>7</sup> Madta caid yacnocquido tsusio dapan shubu anoentsëqui icpondash. Tsusio dapa Pudio

cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. <sup>8</sup> Adnubien Pudion papa chumbo yec pienec aton madon shubu nuntan uepondash. Adec Pudion papa uec quesho tantiash Pabado aid isec nidshun ashunquiobi Nuquin Papa chuishumbic Pudion papa damishquin bëdamepondash Pabadon. <sup>9</sup> Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Èbitsen bëdametsiash, quiash cho-chosho aidotsen bëdamepondash Pabadon. <sup>10</sup> Adosho isun canon choquido bëdamboen tabadmepondash anocquidon. Nidnuesho tantiashun menebampondash mitsana nibëdec quequin.

### *Doma yacno Pabado choash tabadaid*

<sup>11</sup> Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiash tabadash: — Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaic icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. <sup>12</sup> Aidën puduanec nidequi acte nënantan nidaid nacnëdquid utsi yacno choash shubu dadpen icquid Sidacusa caid

yacno choash 3tedec ushquin tabadmepondash. <sup>13</sup> Ambo tabadash puduanquin aid acte nēnantan nidaid nacnēdquid cuēma anoentsēqui potequi nidaid Itadia caid cuēmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidēn buanac badiad utsin shubu dadpen icquid Puteyodi caid yacno chopondash. <sup>14</sup> Ambo choshon Pabadobēd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobēd tabadashic auēshquio puduanec podquedēn nidequi shubu dadpenquio icquid Doma caid yacno chopondash Pabadobēd icquido. <sup>15</sup> Podqued Apio caidēn choec, quequin chuituidac Esuquidistu tantiaquid Doma yacnocquid utsi-utsiec Pabado bēquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsēc chotsec quequin cuēnaid yacnocquido Pabado bēquedoaic nidaneopondash. Aido cho-chosho isashien, Ēbi dayacquio icmenuen nēidtedi mimbi chomioc, Papa, quec dayacquio iquebi, quiampondash Pabado. <sup>16</sup> Adec aido bēquedec choash aucbidi nidec Pabadobēd Doma yacno choapondash. Doma yacno choacshobien Pabado quēnēn nauedenquiocquin shubun tabadmepondash sondado abentsēcshun abēd tabadquin isnubi.

*Doma yacnoshon Pabadon Esuquidistu chuibante*

<sup>17</sup> Adec aton shubun tabadec 3tedec ushun isadaidbo tsusiobo chuinuequin, Aido chome,

capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. <sup>18</sup> Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. <sup>19</sup> Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. <sup>20</sup> Ëmbi chuiboed mibi chuinuequin mibitedi chomiombi. Unësash uincuenta nec, quequin tantiaquin nuquin matsesën cainacpaden cainquid icsho mêtaniaid nebi —quepondash Pabado isadaidbo tsusiobo chiec.

<sup>21</sup> Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. <sup>22</sup> Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

<sup>23</sup> Aden Pabadon tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiactedec ushash Pabado tabadacno

choapondash isadaidbo tsusioboböd utsibo dadpen. Adec cho-choash tabadsho isun: —Mates icsaquid icsho Nuquin Papan cuidnushe quiash abided ciudadec Esuquidistu unëspanëdash. Aid tantiaquid yec Nuquin Papaböd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabadon. <sup>24</sup> Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. <sup>25</sup> Aden abentsëc tantiachimboen tantiatiapimbo yec comapenec onquesho tantiashien Pabado nadpondash. — Nuquin Papan Mayanën Isayas dada uamequin nuquin tsusedpabo naden chuipampic:

<sup>26</sup> “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ëmbi nadatiambocquin nabanaid isted-istedquimbi abimbo isenquo iquendac.

<sup>27</sup> Bëdamboen tantiaboedobi nëbi min mates pamumëdabimboec tabadec; pashuacimboen tantiec tabadoaic; ushacimboecbidi tabadoaic.

Adec tabadenquiocquin ëmbi nabansho mimbi ist-siac. Adembidi ëmbi chiaid mimbi tantiat-



siac. Aden tantiashun mibi icsaid mimbi  
ëntsiac.

Adquiduidi ëmbi bëdambo icmiaid nendac.”

<sup>28</sup> Adesa mibi icnuc isadaidpembo Esuquidistu  
chuimembi. Aden aidi chuisho aidon tantien-  
dac —quepondash Pabado <sup>29</sup> Nuquin Papan dada  
uamiampicpaden chuiquin isadaidbo Doma yac-  
nocquido tantiamenuc. Aden chuisho tantiash  
isadaidbo nidanepondash.

<sup>30</sup> Adembidi seta daëd matamec tabadquin  
Pabadon Esuquidistu chuibampondash. Aton  
shubun tabadquin abi isedec choquidtedi  
Pabadon yuedpondash. <sup>31</sup> Utsi, Chën, quenquioc-  
nobi dacuëdenquiocquin, Nuquin Papabëd tabadte  
iquec, quequin huibampondash. Adembidi  
Esuquidistu tantiamenuen chuibampondash  
Pabadon.

Padi. Esuquidistun, Ëbi chuibeneta, caidon naid  
chuibanquin aidtedi dada uaombi, Teyopido.

## **Esuquidistu Chuiquin Tantiamete New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

446da786-5bd1-5ffa-85e2-9eff4052cf8b